

清季外交史精

卷十七 通商口岸  
附 通商口岸

七

精



清季外交史料卷十七

光緒五年九月至十月

目錄

甘督左宗棠奏陳收回伊犁事宜摺附<sub>上諭</sub>九月初一日

江督沈葆楨奏議覆崇厚喪失國權條約各款萬不可行摺<sub>九月初五日</sub>

總署奏琉球官員到京乞援摺附<sub>稟</sub>九月十三日

甘督左宗棠奏查明俄民寄居喀什噶爾並無驅逐出境情事片九

月十七日

使俄崇厚奏議結中俄交涉各事宜摺九月二十一日

川督丁寶楨奏設法阻止洋員入藏游歷片九月二十九日

禮部奏朝鮮國王咨報與日本商訂開港事竣摺附<sub>咨文</sub>十月初二日

直督李鴻章奏遵議交收伊犁補救崇厚訂約失敗事宜摺

十月初二日

使俄崇厚奏與俄國修約完竣回京覆命請派邵友濂代理公使摺

十月十九日

使俄崇厚奏與俄國議明交收伊犁修定約章謹陳辦理情形摺附

照會十月十九日

總署奏遵議崇厚與俄定約損失國權摺

十月二十七日

目錄

清季外交史摺卷十七

清季外交史料卷十七

男希隱亮編

黃巖弢夫王彥威輯

孫孝章敬立校

甘督左宗棠奏陳收回伊犁事宜摺

附上諭

督辦新疆軍務陝甘總督左宗棠奏爲遵旨覆陳事竊臣於二月十七日欽奉諭旨總理衙門奏接據出使大臣電報並密陳交收伊犁一事各摺片等因比卽恭錄諭旨密致金順錫綸擬俟定商一切會同陳覆因彼此相距甚遠覆到需時謹先就管窺所及敬爲上陳竊維伊犁本我舊土適中原多故遠略不遑猝致淪陷俄人伺釁而動藉詞代爲收

復入據要區亦知所爲本冒不韙佯言俟官軍克復烏魯木齊瑪訥斯  
即交還伊犁更無異說迨天戈西指迅克烏魯木齊瑪訥斯而俄據伊  
犁自若也官軍踰嶺而南拔吐魯番連下八城安集延逆酋既伏其辜  
逆孽與陝甘敗殘逆賊渠目白彥虎等竄入俄境俄官納之屢索不與  
而據伊犁自若冬春之交竄俄諸逆領取俄邊貿易路票三次窺邊爲  
官軍搜獲俄官諉爲不知而據伊犁自若也朝廷重念邦交特命崇厚  
出使以修約而敦睦誼於收還伊犁外並議及界務與商務夫伊犁應  
還不待今日且俄人舊議也今遲之又久始踐前諾其未足市德於我  
也明矣以界務論同治三年明誼與俄官定議準之舊界有縮無贏此  
次卽仿甌脫往事視爲隙地彼此共之在我仍有所損在彼亦受其益

以商務論除邊界舊約無庸更議外布策從前在京師雖頗以嘉峪關爲意總理衙門未嘗輕許自不得卽據爲定論此次崇厚議允其設立領事已過期望凡此皆不待煩言而決者崇厚以全權出使商務界務外更有議給償款之請彼旣利我土地我復許以重酬於議似雖未協然漢文之待北匈奴大單于也詔書而外優以繒帛詞意斐亶故事可循猶之可也皇上俯允所請惟於商務慮其流弊滋多界務慮其再圖侵佔飭崇厚堅持定見崇厚欽遵諭旨與俄之外部諸臣從長計議理足而將之以誠我睦鄰之誼盡而又盡彼饜足之道加無可加若界務於同治三年定議外再許侵佔商務於嘉峪關內再允推廣則有關國家疆圉華民生計者甚大在拮据戎馬機會迫促時猶未可輕議及此

矧值天威遠被遐邇震懾何爲必出此下策以苟安目前竊恐俄人識時務者或疑過情之許爲不誠其無知者翻疑我情實之兩誑有爲而爲之論端日出應接不暇固無論舐糠及米異時防不勝防必將於大局有誤也臣愚竊謂伊犁塔爾巴哈台一帶舊界已難復按則仍以同治三年所定之界爲定而以舊界作甌脫隙地俄人或有在隙地內造屋居住一時難於遷徙者亦姑聽之但定爲甌脫隙地禁其日後修造可也所有哈薩克各部落之舊屬中國新附俄國者一併劃明界址毋俾混雜其喀什噶爾英吉沙爾一帶舊設卡倫爲逆酋阿古柏所毀逆酋於相距二百里內外改設卡倫查本安集延故地此次用兵追賊所得因移舊卡於此地雖在舊界之外與俄無涉不在約內此界務大略



也至商務已允其嘉峪關設領事通商其由俄邊而來入中國境如古城巴里坤哈密安西玉門等處地方皆其必出之途由古城經過者有官有驛足資照料惟旁境可通車駝者尙多應分設塘汛容俟察核辦理嘉峪關城地極褊狹俄設領事於此勢多不便或於肅州城內外度地居之地之相距僅六十里亦易照料由官置地建造租賃俄官居住按月薄取租值並無不合俄之官商不得私向民間購基造屋致滋論端此商務大略也至由肅州高臺經甘涼兩郡以達蘭州省會由蘭州南路以達漢中或由東路達陝西省會由西安以達漢中而均指漢口爲銷貨置貨之地由俄邊至漢口水陸萬里而遙歷新疆甘肅陝西河南湖北轄境陸程居其大半至龍駒寨荆紫關各處始有小船可僱餘

皆車駝曳負而行道路修阻途境錯雜俄商零星裝運防護難周時有疏失之慮如其聯幫行走尖站過載主客相參易滋口舌俄商性情高傲計較最工內地無賴之徒從而簸弄事事倚藉外人聲勢搆衅生端官司不能譏禁偶有牴牾輒干吏議各省大吏相距太遠聲息難通事關中外交涉咨行察辦往復需時兩造各執一詞難於究詰案懸莫結動經數年督責既有時而窮調停復無計可設而疏漏冒混獄市多擾姑不具論此患之中於官者也甘肅地瘠民貧向不知經商服賈之利土物行銷外省者煙葉藥材而外別無大宗民間所用車輛多係無鐵高輪牛馬駕曳負重而不能行遠馱貨用驢於農隙受僱運貨以供餽養而資其餘利陝西駕車多用騾馬惟馱貨用騾騾產自河南嵩洛間

非陝所出陝民以車馱爲業購騾於豫攬載通行百貨藉以運銷公私均取給於此軍興日久牲畜疲乏倒斃爲數本多加以陝豫瀟饑民間因饑養缺乏宰食充腹者不少於是車馱之價頓增百貨轉運因之而滯民間以私蓄車馱牛驢於農隙短運取值以資過度若允俄商入內銷貨置貨則車馱僱價益昂民間短運將廢生機頓塞殊非所宜此患之中於農者也商賈行銷茶爲大宗茶之所產以楚爲盛甘肅舊有茶商行銷之茶設有官引從前私茶充斥官引不行軍興以來官商死喪流亡茶務倒歇臣不得已奏請改引爲票招販承銷裁革陋規聽民自便於是茶販踵至迨官軍復地漸廣可冀暢銷而私茶又由山西包頭藉行銷蒙古繞道草地浸銷新疆北路間有倒灌南疆者臣飭古城巴

里坤印委各員實力查禁而偷越仍難杜絕惟南疆吐魯番八城纏回見磚茶則喜謂卽承平時湖茶非私販筒子茶可比惟地方新復銷數尙未能暢官茶屯滯各處者尙百餘萬斤然兩年不能銷盡而票販成本息耗愈久則虧累愈鉅正思減價出售以清夙累若允俄人入內地置貨勢必侵佔官茶引地票販虧累無從取償此患之中於商者也經商之事必先計成本所謂成本者合貨價運腳盤攬三者估之攤入貨色爲成本再計市值之高低爲利息之贏縮大抵皆然泰西各國之通商者均由海道入長江抵漢口雖遠逾數萬里而皆一水可通貨價雖同而運腳較陸程減少不止十倍洋商初入長江見漢口爲百貨匯萃埠頭爭於其地購地修造洋行又於漢口下游江西之九江購地如式

修造洋行既成傑構臨江自誇得計乃不數年生計蕭條得不償失並  
兩處洋行覓主求售亦不可得水路經商尙如此之艱也茲俄商不顧  
崎嶇萬里欲與海國競此貿易之利前車既覆後軌方適加以陸運脚  
價行棧盤攬合計成本較各國商人奚啻十倍過之縱使善於營運折  
閱固在意中雖彼自失算於我無尤然折閱必不甘心又將顧而之他  
爲求贏之計於是而電線鐵路諸事論議紛紜殆有應接不暇者斯時  
偶與通融異日卽添無數煩惱再圖補救悔之已遲此患之中於國計  
者也臣愚再四籌維俄商若由嘉峪關歷甘肅陝西河南湖北而抵漢  
口銷貨置貨彼此實無利益徒多擾累非賴使臣欽遵諭旨堅持定見  
剴切言之俾決計阻止不可至洋藥流毒日久必思所以禁之論其辦

法次第必自內地禁種罌粟始內地不產菸則其價必昂價昂則吸之者自少然後禁令可張始有更新之望甘省遵旨禁種罌粟著有成效上年曾經奏明現復據司道詳稱先後據府廳州縣稟報印委各員躬親巡歷不憚勞苦民間奉令惟謹實已根株淨盡惟懇出示曉諭禁止外來土菸如有川滇客民販土入境者當衆焚燒薄與責懲令其改圖貿易奸販亦漸知聳懾臣擬俟覆核確實再行具奏茲閱崇厚商改章程第十五款於洋藥定議稍寬其禁准在口銷賣與甘肅現行章程不合若照所議不特無以慰此邦官紳士民望治之心亦無以杜川滇商販之口崇厚未悉現時甘肅辦法故有此議可否仰懇天恩諭將洋藥一項芟除定議伏候聖裁猶憶光緒元年俄使索思諾福斯齊等在蘭

州與臣談及將來通商事宜卽言斷不令俄商販鴉片入中國似洋藥流毒爲中國所不容亦俄人所共知也諭旨垂詢崇厚電信所稱喀什噶爾寄居俄國屬民驅逐出境及和闐有亂住俄回民欲入喀什噶爾滋事各節是否確有其事臣已恭錄移知金順劉錦棠矣惟新疆南路文報絡繹從無隻字道及未知崇厚果何所聞或俄人意欲釋其前此縱賊犯邊之嫌則未可知近接道員羅長祐緘稱英國駐土耳其領事有來喀什噶爾會晤之意措詞甚恭又稱今正大捷漏逸賊酋愛木克漢條勒阿布都熱哈瑪國俄人不肯收納寄居烏魯克恰提近甫渡河而南招致回部游手意在窺邊羅長祐已調馬步兩旗赴烏帕爾築壘以待餘均照常安謐合併附陳謹奏光緒五年九月初一日奉旨左宗

棠奏交收伊犁事宜崇厚現已定議惟有急圖補救著該大臣遵奉八月二十三日諭旨將界務商務詳慎籌奏所稱甘境不銷外來煙土仍著體察情形籌辦

江督沈葆楨奏議覆崇厚喪失國權條約各款萬不可

行摺

兩江總督沈葆楨奏爲俄人要挾太甚應將使臣所議作爲罷論不宜顧已破之甌以搖全局遵旨籌議密摺馳陳事竊臣於本月初一日承准軍機大臣密寄光緒五年八月二十三日奉上諭總理衙門奏籌辦交收伊犁事宜請飭疆臣核議一摺著左宗棠金順錫綸將界務商務各條款悉心酌核李鴻章沈葆楨素顧大局除商務各條詳加籌畫外



其界務如何辦理始臻周妥之處分別詳細密陳原摺片著鈔給閱看等因欽此查崇厚與俄國所立條約其第一款曰允還伊犁以下各款無非百倍取贏之意蓋以我所注意者在此故彼所挾以居奇者亦在此使索還以後永斷葛籐事事由我自主償費乃爲有着若割地對抵奚啻割無瑕之肉以補已潰之瘡况復推波助瀾得步進步總理衙門所奏固已燃犀照影毫髮畢呈矣西北地輿臣未能深悉形勢但就所立條約言之伊犁雖已收回盤據無非他族名曰得地實則寄居割去之陬爾果斯帖克斯河必尙在伊犁以內扼吭拊背我不啻入其伏中求一舉手動足而不可得較古人所謂如得石田者所失奚啻百倍宜宸廑之輾轉不釋而總理衙門亦通盤籌畫兢兢於駟馬之難追也第

原奏所最躊躇者謂既允復翻其曲在我查萬國公法云使臣執全權  
議約雖已明言其君必將准行若有違訓事件則君不必准也況此次  
約章明言候御筆批准並未明言國家必將准行且逐條皆於批准二  
字再三申意則未奉批准卽當作爲罷論其理明甚不能責我以違約  
也縱使萬不得已不如光明正大許以不索伊犁以塞其多方要挾之  
計明知祖宗之尺寸不可與人臣何敢冒不韙之名爲棄地之請第有  
所得卽有所失已不過以彼易此况所得大不償所失且名爲得者實  
則毫無所得而後患正不可知語曰兩害相權取其輕又曰毒蛇螫手  
壯士斷腕戀一子而全局糜爛能棋者斷不出此至該國向漢口運貨  
本有長江條約可循若口外通商縱未能拒絕亦當公平交易彼此如

一倘許以免稅則西北利權一網打盡如民生何如國計何除詳細情形應由左宗棠等就近察看籌議外所有遵議緣由謹恭摺具陳謹奏  
光緒五年九月初五日奉旨

總署奏琉球官員到京乞援摺

附原稟

總理各國事務恭親王奕訢等奏爲琉球官員到京乞援當經剴切開導並擬資遣回閩事竊查日本廢琉球爲縣一事臣衙門曾於閏三月初五七月二十一八月初五等日將密籌辦理情形具奏在案本月初八日有琉球耳目官毛精長通事官蔡大鼎林世功等三人偕同中國通事謝姓來臣衙門求見臣等先令總辦章京接見該琉球官等面遞稟詞臣等公同閱看內稱國遭日本侵滅將國主世子執赴其國迫索

詔勅御書扁額寶印並脅取簿冊暨倉庫所藏錢糧苛責掠奪無所不至爲此薙髮改裝由閩附舟北上籲請據情奏乞天威迅賜救存以復貢典等語情詞悚迫臣等因令於十一日來見該球官等俱中國服色伏地哭拜不起所言與稟內大略相同臣等善言撫慰諭以爾國之事迭經奏明設法辦理且宜靜候該球官等唯唯而出臣等查該球官等三人改裝來京乞援情形殊堪矜憫且聞日本曾有拿解球人之說自宜妥爲保護該球官等並已在禮部遞呈若守候日久誠恐別生枝節致多窒礙臣等公同酌量擬由臣衙門發給川資銀三百兩派弁送至天津再由李鴻章派員護送回閩以示體卹謹奏光緒五年九月十三日奉旨依議

## 附琉球國官員稟

琉球國前進貢正使耳目官毛精長等謹稟爲國滅主執民不聊生號懇據情奏請天恩迅賜救存以復貢典事竊敝國自遭日本阻貢以致脅執國主種種陵虐疊經稟明閩省督撫大憲籲請奏聞各在案理宜恭候天朝辦理何敢冒瀆緣八月初五初七等日據敝國官吏向好問金德輝楊逢春等來閩報稱先後奉王弟尙弼命飾爲漂風抵閩之狀再行告急敝國慘遭日本侵滅竟將國主世子執赴該國屢次哀請回國不肯允許乃謂現與中國互相葛藤應俟大局已結飭行復國本年五月王弟尙弼等業經特飭向廷槐等抵閩請救舉國昕夕實深盼望詎意日人於六月十四日率領巡查兵役突入

世子宮先將各門緊守迫索歷朝頒賜詔勅此乃小邦鎮國之寶虔誠供奉豈敢輕以示人當卽再三懇說日人不聽各官與之據理爭論日人大怒立召巡查數十名毒打各官直行脅去至天朝欽賜御書扁額寶印亦恐被其奪掠百方謹護憂慮滋深又近日上自法司等官下至紳耆士庶外而虎島監守官筆帖式暨其頭目土役人等多被日人劫至各處衙署嚴行拷審或有固執忠義自刎而死者又將諸署所有簿冊暨倉庫所藏錢糧一概脅取且馳赴諸郡迫以投納賦稅卽行嚴責復將所積米穀擅行封去除此之外首里久米那霸各府被其蹂躪者指不勝屈又本年六七月間有疫癘流行該日人在那霸地方假設醫局託言療疾強將染病之人帶去莫知踪跡

或有割胸取肝嗚呼日人封豕長蛇既吞國執主復囚官害民苛責掠奪無所不至非仰仗聖天子之聲靈迅賜救援別無籌策等語長等一聞之下肝膽崩裂相共飲泣業已具稟哀懇閩省大憲據情陳奏迅賜救難伏念敝國累世相承上膺冊封久備外藩自國主以迄臣民罔非天朝赤子今遭倭人荼毒竟致主辱國亡長等誤國之罪萬死猶輕爲此薙髮改裝附舟北上長跼哀號泣血籲請除稟總理諸位大人外伏乞大部大人俯憐二百年來效順屬藩被倭陵虐待拯孔亟恩准據情奏請皇上宣揚天威迅賜救存以復貢典則闔國感戴皇恩憲德實無涯涘之至再此番進京應先稟明閩省大憲仰候允准而後啟行祇因事在急迫救主情切是以不揣冒昧瀝情逕

稟犯法之罪所不敢辭惟求恩全不勝激切惶恐之至謹稟

甘督左宗棠奏查明俄民寄居喀什噶爾並無驅逐出

境情事片

左宗棠片 再臣欽奉諭旨崇厚電信所稱喀什噶爾寄居俄國屬民驅逐出境及和闐有亂住俄回民欲入喀什噶爾滋事各節是否確有其事著左宗棠金順查明具奏欽此臣比恭錄咨行劉錦棠查明具覆以憑覆奏茲准劉錦棠覆稱查逆酋阿古柏本安集延人所用各頭目官皆其種類卽未充頭目者亦無不倚勢作威相助爲虐西四城克復時除著名首要各逆已經擒斬外餘隨逆豎柏克胡里竄俄其安集延丁口寄居喀什噶爾者約尙數千劉錦棠仰體皇仁未卽驟加誅戮咨



商處置之法臣比答以此輩若與纏回狎處異時終啟邊衅應詢明願歸安集延者仍放歸故土餘均擇地安插劉錦棠飭各城善後局傳諭照辦其中有願歸故土而已在各城置產者准其估價出售本地民人爲業不准稍有抑勒自上年春間至本年夏季疊經各局陸續放歸甚多其偶有遷延則皆因產業求售無主者也然亦未嘗勒限驅遣稍事迫促竊查安集延本係浩罕四部之一俄國雖併其三部而安集延人隨阿古柏竊據回疆未爲俄所兼併固天下所共知茲俄人旣認寄居喀什噶爾之安集延爲所屬之人則安集延之舉動應由其指使何以安集延人隨同阿古柏入寇回疆俄國並不加約束如謂我之寬宥安集延人放其自歸故土並准其出售產業復聽其自歸不加迫促以爲

驅逐姑勿論勒據回疆之安集延本非俄屬俄之代抱不平不值一哂我之待安集延又實法外施仁無可復議也此不可解者也和闐民富而性馴就撫以來地方各署訟獄亦稀閏三月內有鐵匠咬不拉爲人打造腰刀二十把託商民帶赴退擺特地方發賣居民以形迹可疑告局局員葉自遠以私造軍器事關重大稟知劉錦棠劉錦棠以此案牽引七人慮有冤蔽飭解赴行營訊結尙未解到縱令私造腰刀實有異志亦焉能爲何煩俄人代爲過慮此不可解者也如謂誤聞浮言卽以見告足表其關念之誠則此次窺邊逆酋由俄邊驅逐而來俄官豈復諉爲不知何獨無一言見告乎再四思維或布策輩因崇厚以誠相許易售其欺乘此界務商務議論紛紜有求必應時更加迫促俾墮其計

中耳既蒙垂詢及之謹據劉錦棠所陳覆奏光緒五年九月十七日奉旨該衙門知道

### 使俄崇厚奏議結中俄交涉各事宜摺

出使俄國大臣崇厚奏爲與俄國交涉未結各案現擬完結辦法事竊查歷年與俄國交涉之案層見疊出經總理衙門王大臣與俄國駐京使臣反覆辯論迄未議結嗣與之商及交涉伊犁之事其使臣復堅稱中國須將交涉各案先行辦結方可商議交還等語臣此次行抵俄都往見其外部尙書格爾斯允爲商辦各案以爲交還伊犁之計已於本年三月二十八日奏明在案旋與中國前駐京使臣布策說明各案五起分議照會五件於定約之前先爲議結以清積牘查各案中如江漢

清季外交史料卷十七  
關扣留俄國輪船及前任塔爾巴哈台參贊大臣英廉殺斃俄屬哈薩克車隆與烏里雅蘇台官員責打俄人薩哈賴蘇然審兇三案所擬辦法尙無出入布策本有請將英廉革職永不叙用之說經臣力爭而止布策將車隆另行開單請卹現已歸入卹款辦理故照會不敘練總徐學功於規俄商貨幫一事前據陝甘督臣左宗棠查覆總理衙門函中有將該員罰銀一萬兩之議故照會中卽本此意立言而仍將所罰銀兩一併歸入卹款辦理惟察罕格根詬辱俄官一事情節較重格爾斯亦屢向臣辯論該處前後所出兩案布策有期令格根至斜米爾省賠禮之請不特無此政體且恐另生枝節更爲不妥查察哈格根本係獲譴遷徙之員又復不安本分疊次生事俄官受其欺侮有違奉旨批准

和約故照會中擬爲奏叅交理藩院嚴議革去差使照會俄國外部去後接其照會復稱各節除叅徐學功一案照議辦理外其餘各案均期由總理衙門奏請上諭行知各處並出示曉諭臣將其照會鈔錄咨呈總理衙門查核奏明辦理並照覆俄國外部外謹將所擬各案辦法恭摺具陳謹奏光緒五年九月二十一日奉旨該衙門知道

### 川督丁寶楨奏設法阻止洋員入藏游歷片

丁寶楨片 再臣前准西甯辦事大臣喜昌來咨以馬加國攝政義奧斯圖凱來賴等擬由青海赴藏遊歷知照派撥員弁至柴木達交界迎護當經飭知各廳營委員派撥弁兵赴交界處迎護業經奏明在案嗣准該大臣及陝甘督臣左宗棠以該員行至青海見該處難以行走因

知四川至藏係驛站大道可以無阻復改道由蘭州秦州一路由川入藏咨令派護復經札飭川境各屬派人探明迎護茲該洋員攝政義等已於八月初十日行抵成都省城時臣在闈監臨又值鄉試士子雲集誠恐聚集喧嚷別滋事端隨傳諭成都縣妥爲安置旋據該縣面稟該洋員自稱急欲進藏定於十五日起行臣以藏中情形現據駐藏大臣松澁來咨以闔藏番衆人等已聯名具稟出具圖片仍欲攔阻該洋員前進兼稱已經據情奏明請俟奉到諭旨再行遵辦等情臣惟該洋員堅欲進藏其情斷難久候而藏番既如此違抗將來如遇入藏肇衅卽在目前必須設法勸阻能得其改道前赴印度方爲妥善復傳諭成都縣令其代臣致意該洋員留其小住數日俟臣出闈與之面談一切再

爲起程言之再四該洋員始肯稍爲等候臣卽於二十日出闈前往拜晤談論之間該洋員堅稱必須進藏萬難轉移並云一晤之後卽便起程等語臣查其意甚堅遂將藏番固執不通於外洋人進藏卽行攔阻實難理喻並舉前數次赴藏洋人及臣所派委員均被阻改道各情剴切與言又以川省保護亦只能至交界之巴塘爲止此外係屬藏地向無管轄不能前進卽勉強護送而彼此呼應不靈亦屬無益至駐藏大臣派人迎護自是一定辦法惟駐藏大臣在藏亦不能盡管藏番之事其中尙有藏王主持且旣係入藏藏地乃該番地土彼旣不願人前進駐藏大臣亦豈能強以必從况駐藏大臣所派亦只是派撥番人今旣不肯令人進藏卽派之必不能聽駐藏大臣亦屬無法請其細加詳度

不可倉卒執意等語該洋員初不相信及臣與之辯論多時始覺有知難之意惟其堅執成性不肯遽行遷就臣當時自行籌度此時若急於阻止遽令改道彼必以爲我等有意阻攔將來反謂藏番一切情形皆我等主使必多曉舌不若仍促其前往使彼知我之並非故爲攔阻以釋其疑乃特派委明幹之員隨同前行密諭以彼到巴塘時先不必用言勸阻但將現在藏番攔阻甚力一切實情與之言明即請其派人會同委員前往交界處所一爲查看再定行止臣料該洋員在此經臣設法解說已大有改道之意若在巴塘一看藏番情勢當必廢然思返迨彼自知其難向委員商量行走之路然後委員乘機與言從前各起洋人進藏均係在此改道由雲南前赴印度請其自爲斟酌如不願冒險



惟有仿照辦理彼時該洋員實逼處此無可如何自不得不從既從之後再爲多派兵役妥爲護送該洋員乃一無可藉口而此次能阻其不得進藏則以後遊歷之員亦不至接踵而來庶可獲數年之安此乃欲收先縱之法臣用意如此已密諭該委員等遵照妥辦總期不令入藏生事庶以仰慰聖懷現該洋員已定於二十五日由省城起程臣已派撥弁兵人等沿途妥爲保護俟其到巴塘後如何情形再行奏聞謹奏  
光緒五年九月二十九日奉旨該衙門知道

禮部奏朝鮮國王咨報與日本商訂開港事竣摺

附咨文

禮部尙書恩承等奏爲據咨轉奏事准盛京禮部送到朝鮮國王咨文一件臣等公同閱看係因該國與日本商酌開港地方事竣懇請轉奏

清季外交史料卷十七  
一五  
謹鈔錄原咨恭呈御覽謹奏光緒五年十月初二日

### 照錄朝鮮國王咨禮部文

朝鮮國王爲咨報許日本開港地方事光緒五年四月二十四日日  
本代理公使花房義質派來小邦小邦照往年例館餼於闈外宴饗  
於禮曹使刑曹參判洪祐昌兼伴接官句檢公幹商酌事宜特許開  
港於咸鏡道德源府海口即因丙子條約二處開港之文也其外一  
處則姑未指定再來之期以更報爲言本年七月十七日該日本公  
使竣事發還等因竊伏念我小邦偏荷聖朝仁覆之澤自有日本事  
幹蒙總理衙門暨部堂大人先事指劃宣力周章已多年所小邦君  
臣感恩頌德曷以爲報茲將與日本商酌開港等事略具顛末仰塵

崇鑑煩乞禮部照驗轉奏施行

直督李鴻章奏遵議交收伊犁補救崇厚訂約失敗事

宜摺

直隸總督李鴻章奏爲遵旨籌議交收伊犁事宜事竊臣奉八月二十三日密寄籌辦交收伊犁事宜欽此伏查俄人據守伊犁將近十年每歲收其商農之利數十萬金其平時注意開疆拓土得尺得寸不稍退讓卽迫於公論礙於成約不能不還我故地然彼國上下視爲奇貨藉端要挾不饜其慾壑不止俄人陰鷲狡詐雖英德等國皆視爲勁敵而憚與共事然出使大臣宜沉毅堅忍置得失榮辱於度外又必統籌全局相機應付以全力與之磋磨乃至墮其術中中國士大夫風氣向

以出使爲畏途平時講習俄事者尤少而此事一出入關係甚鉅往者臣籌及西事每不免鯁鯁過慮者誠恐恢復故疆則有名而無實變通商務或受損於無窮也議者初慮俄人浮開兵費俾我力不能償爲久假不歸之計今核計償銀二百八十餘萬兩尙不甚多俄人之喜於操縱而隱肆要求者在此崇厚之受其牢籠而不免遷就者亦在此不知償費一層中國卽多出數百萬金雖竭蹶於一時不至貽患於事後若界務商務則幾微不慎後悔難追在崇厚或因使俄之役以索還伊犁爲重既急欲得地以報命而他務之利病遂不遑深計誠未免失之輕率謹將議定約章詳加考核除其中不甚關輕重者無庸置議外其第四款俄人在伊犁准照舊管業第十款於喀庫二城設領事外准添

設嘉峪關等七處領事官第十二款俄國在蒙古天山南北路貿易均不納稅第十三款設領事處及張家口准設行棧第十四款俄商運俄貨走張家口嘉峪關赴天津漢口過通州西安漢中運土貨回國同路凡此俄商所沾之利不如是不足慊其意而伊犁亦不肯還彼此民人雜處則界限仍未分明添設口岸太多則辦理易生枝節其餘奪華商之生計侵官茶之引地在彼獲益不少在我耗損已多至分界之事第八款塔城界址稍改現尙未知其詳第七款中國接收伊犁後陬爾果斯河西及伊犁山南之帖克斯河歸俄屬就總理衙門寄到分界圖說核之伊犁西界割去一條長數百里其患猶淺南界割去一條亦數百里跨據天山之脊隔我南八城往來要道細揣俄人用意一則哈薩克

魯布特游牧諸部新附俄邦今復遮其四境絕彼向化之途一則扼俄咽喉使新疆南北聲氣中梗心殊叵測夫中國所以必收伊犁者以其居高臨下足以控制南八城談形勢者謂欲守回疆必先守伊犁也今三面臨敵將成孤注自守尙不易圖烏足控制南路想左宗棠礙難遵辦是界務與商務相較界務固尤重矣總理衙門原奏謂收回伊犁尙不如不收之爲愈均爲洞見底蘊查同治八年英國新約以彼國未經批准至今不行同治二年葡萄牙使臣來約以爭論澳門設官一事迄今未換現修俄約既有批准後通行之語又有西約成例可援原可置之不行且與萬國公法所論亦有相符之處惟此次崇厚出使係奉旨給與全權便宜行事之諭不可謂無立約定議之權若先允後翻其曲

在我自古交鄰之道先論曲直曲在我則侮必自招用兵之道亦論曲直曲在我則師必不壯今日中外交涉尤不可不自處於有直無曲之地我既失伊犁而復居不直之名爲各國所訕笑則所失更多且彼仍必以分界修約爲詞時相迫促迫促不已必生兵端而西北路各軍與俄人逼處積不相能約既不換則隨事易生猜嫌亦難保不漸開邊衅中俄接壤之處約萬餘里實屬防不勝防迨兵費一開其所要求恐有僅照現議而不可得者况日本探聽伊犁消息以爲訕伸進止若聞俄事不諧或且伺隙而動卽英法各國修約恐亦因而生心是崇厚所定俄約行之確有後患若不允行後患更亟中國必自度果能始終堅持不至受人擠逼且必自度兵備完固軍餉充裕足資控禦乃可毅然爲

之否則踟躕審顧祇能隨宜設法徐圖補救並宜稍示含容免使他國  
聞知長其效尤之計竊思崇厚電音簡略其定約時如何辯議尙未盡  
知若使當日明知俄人各事必俟批准後方能舉辦或另有活動之語  
或別有轉圜之法約計該大臣冬月可以回京應由總理衙門王大臣  
密與詳詢體察情勢俟換約時能否將界務商務酌議更改得一分亦  
獲一分之益倘實無可改易無可延宕將來界務應如何布置諒左宗  
棠必就近酌度妥辦至商務補救之方大要有二一曰立法一曰用人  
查泰西各國彼此商人皆可隨地貿易居住耦俱無猜由其用法之善  
中俄舊約原許俄商順便往蒙古各處貿易今既擴充甚多宜審各處  
民情地勢俾當事者督同地方官妥議章程由總理衙門核定劃一暫



爲試辦以便籌商經久之道其張家口嘉峪關爲東西兩路入內地握要之處尤宜嚴密稽查凡沿途抽換私賣逃稅等弊分別照約罰辦勿稍含混如果沿途不得銷售包攬則於無限制之中稍有限制此立法之要也惟是人存則政斯舉徒法不能治民將來陸路通商愈廣交涉益繁更制必益多其安肅道及張家口監督兩缺宜與海關道員並重新疆各城之郡縣暫難改設或擇要添設道員遴選洋務人才設法調劑以期辦法妥協至各路將軍持節臨邊責任艱鉅必得熟諳時務威惠交孚者乃有神益似應不拘資格滿漢文武並用以重邊防而資整理此用人之要也以上兩端或稍可補救於萬一是否有當謹候聖裁謹奏光緒五年十月初二日

使俄崇厚奏與俄國修約完竣回京覆命請派邵友濂

代理公使摺

出使俄國大臣崇厚奏爲修定條約完竣應卽回京覆命暫留參贊仍駐俄國署理出使大臣以固邦交事竊臣於八月十五日在俄國黑海地方與俄國全權大臣格爾斯布策修定條約畫押蓋印當卽專摺具奏並將約章鈔錄呈覽伏查各國定約使臣一經定約後親帶所定約章回國仍留參贊署理以固邦交臣查頭等參贊邵友濂本係總理衙門幫總辦章京隨同臣到俄國辦理修約各事謹慎安詳深知大體於各國情形均能熟悉以之署理欽差出使大臣可期勝任臣曾函商總理衙門王大臣意見相同並由電報請據情代奏在案現在修約事竣

臣應卽回京覆命將修約奏檔經費案件出使大臣關防交頭等參贊道員邵友濂署理以固邦交並照會俄國外部謹將照會鈔錄呈覽理合專摺具陳光緒五年十月十九日奉旨知道了

使俄崇厚奏與俄國議明交收伊犁修定約章謹陳辦

理情形摺

附照會

出使大臣崇厚奏爲與俄國外部議明交收伊犁修定約章蓋印畫押謹陳先後辦理情形恭摺具陳事竊臣自行抵俄國後與外部商辦各事大概情形已於本年三月二十八日奏明其緊要情形電報總理衙門代奏各在案閏三月初間外部尙書格爾斯隨其君赴南省巡閱其駐京使臣布策告假回國奉其君之命與臣商議一切布策在中國年

久取益之處知之有素臣度其萬難允許者細爲辯論擇其尙無妨礙者量予通融查格爾斯初次送來節略所稱各節皆係俄國君諭令外部遵辦之件臣因逐款與布策議明每議一事動閱兼旬並與格爾斯會商十餘次計前後晤商數十餘次辯論不下數萬言半年之久始訂定條約十八條其大端曰交收伊犁曰兵費卹款曰分界曰通商第一條首將交還伊犁地方與伊犁分界兩事提明其所重已可概見第二條載伊犁居民乞恩赦免其罪經臣兩次具摺奏請業經奉旨將伊犁回人從寬免罪諭令左宗棠明白曉示第三條載伊犁居民已入俄國籍者願留願遷均聽其便照俄人一律看待第四條載俄國人在伊犁所置產業照舊管業第五條載接收伊犁之大臣前已奉旨簡派塔爾

巴哈台參贊大臣錫綸會商大學士左宗棠等籌辦接收各事宜現擬俟御筆批准條約後由左宗棠派員至塔什干城知照俄國圖爾克斯唐總督高甫滿於兩月內將交收伊犁辦竣以上五條皆係指交收伊犁之事而言第六條載代收代守伊犁兵費暨補卹俄人之款共銀盧布五百萬元查兵費與卹款本屬判然兩事前據外部開來俄商虧款及俄人被害清單九十餘案請爲補卹嗣布策面稱續查邊界咨報之案尙不止此至代收代守伊犁八年有餘所需兵費頭緒過多外部統爲覈計將兩項合爲一欸從前倭良嘎理曾向總理衙門有俄國代收伊犁傷人費餉之語經大學士文祥告以中國素重報施此欸誼應籌及臣初次致外部節略即允以籌還以覘其意迨再三詢問始行說明

察其所言尙係實情此項銀兩議明自交還伊犁之日起換約後一年內歸完另立專條覈計金磅數目勻爲三起次第歸完泰西各國通用英國金磅皆有一定市價現已覈明共用英金磅七十九萬五千三百九十三磅卽銀盧布五百萬元約覈庫平銀二百八十餘萬兩若由總理衙門轉飭總稅務司辦理必能覈實第七第八兩條內載分界之處有三一伊犁界前據外部送來節略其國君首以伊犁西南界爲請注意甚堅旋據格爾斯面稱伊犁係形勝之區自俄國收取後控制回部聲勢頗壯論者咸謂必不可還而國君與外部敦崇睦誼故有是舉特交還後力量不免稍弱故不得不稍分其界以爲自固疆圉之計臣於三月二十八日摺內業將此情奏明在案嗣布策來議交還之事又有

交還之後仍令俄兵暫紮綏定城保護回民之說事有關礙未與定議  
迨圖爾克斯唐總督高甫滿來特議謂綏定屯兵兩國易起爭端請將  
格得滿島北數村卽霍爾果斯河西南地方分歸俄國安置回民綏定  
城屯兵作爲罷論伊犁八城要地均歸中國有山河爲界一喀什噶爾  
果浩罕地方近屬俄國爲費爾干省議將界址劃清以期久遠一塔爾  
巴哈台界該處哈薩克冬夏游牧往來無定稽察難周議將人地分清  
永安邊境此皆外部節略聲請格爾斯布策屢次議明均係爲兩國安  
邊起見另備分界地圖兩分畫押爲憑第九條內載明安設界牌之所  
應由欽派分界大臣會同俄國大臣酌定以上三條係指分界之事而  
言第十條係爲添設領事官查伊犁塔爾巴哈台喀什噶爾庫倫舊約

皆准設領事兩員科布多烏里雅蘇台准設領事嘉峪關領事地當衝  
要兼管西安漢中商務較繁若有交涉事件地方官與之相商公事有  
益第十一條係爲領事與地方官往來禮節查兩國官員本不相統屬  
各國公法兩國官員往來多以客禮相待因允其遇有公事通用信函  
會晤時以友邦官員之禮相待第十二條係總論通商第十三條係設  
立行棧等事第十四條載明陸路通商行走之路第十五條聲明定章  
修改年分第十六條爲會定茶稅之事查俄商以販運茶葉爲大宗分  
種類之高下別價值之低昂向有下等茶數種按上等茶納稅俄國駐  
京大臣屢向總理衙門聲請酌減現擬俟批准條約後於一年內由總  
理衙門會同俄國駐京大臣酌定查通商一端同治八年總理衙門與



前駐京大臣倭良嘎哩改訂章程行之數年前屆修約之期布策擬出多條在總理衙門會議修改因其所請過奢數年未能定議臣此次修約又申前說頭緒紛繁相持數月始仿照舊章議定陸路通商章程十七條如俄商准由嘉峪關至漢口查西路運茶一事其駐京使臣屢向總理衙門聲請曾允俟關外軍務肅清後方可議辦該關距漢口數千里沿途山路崎嶇布策屢以漢中西安爲必由之路准俄商行走爲請因援照張家口通州東壩舊章准其擇路行走而仍以漢口爲歸宿又俄商准由張家口嘉峪關運貨入內地查海口通商總例本許洋商入內地買賣該關口現旣作爲通商處所自應按照總例辦理以免偏枯又俄商由尼布楚暨由科布多過歸化城進張家口本係蒙古地方俄

商貿易之所准其行走俯順商情另附清單開列過界卡倫查中俄沿邊萬餘里處處接壤過界之路過多若不定明卡倫無從稽查現定兩國邊界官查明後報由總理衙門與俄國駐京大臣核辦第十七條係更正舊約之語乾隆五十七年恰克圖市約載明盜竊之物加倍罰賠至咸豐十年北京定約時俄文改爲不加倍賠償漢文繙譯爲不管賠償以致遇事爭論今特爲聲明拿賊追贓官不代賠以符總例其商務之另立專條者松花江行船一事咸豐八年愛琿和約內開松花江准俄國行船並准貿易嗣經該處地方官禁止俄人前往松花江上游行船貿易布策將約內松花江添寫上游字樣臣以上游之地直至吉林所包太廣再三辯論僅允其至伯都訥行船貿易議立專條其餘約章

所載或變通辦法或推廣舊章第有便於商情要無妨乎大體竊念兩國邦交之重萬里連界之遙在伊犁之交還固大局所攸關而約章之定明實伊犁之所繫前者大學士左宗棠督師西下將士用命轉戰多年將天山南北路全境肅清人心望治今出水火而登諸衽席休兵息民諸事可從容布置臣疊承恩命指授機宜統籌中外之情形審慎事機之輕重惟願我國家收回伊犁安邊民以副蒼生之望允開商路睦鄰國以宏懷遠之謨所有與俄國外部商定約內緊要各條聲明統俟御筆批准後開辦施行繕就漢文俄文各兩分另備法文兩分以資考證俄國外部尚書格爾斯隨其君主至黑海地方離俄都四千餘里臣乘火輪車至該處於八月十七日與格爾斯布策將條約章程蓋印畫

押謹將議明交收伊犁等事條約一分陸路通商章程一分卡倫單一件專條兩件鈔錄呈覽謹奏光緒五年十月十九日奉旨該衙門議奏並著咨行李鴻章左宗棠沈寶楨一併妥擬具奏

附註查本案所附交收伊犁條約陸路通商章程卡倫單及專件等業經分載光緒六年二月二十二日總署奏俄國分界通商摺並七年閏七月初九日總署奏中俄換約摺內茲特刪去以免重複

### 照錄崇厚致俄國外部照會

爲照會事本大臣奉命前來通好修約承貴國大皇帝外部篤念友邦講信修睦本大臣感謝之至今將約章定妥本大臣親帶條約應回本國覆命現留頭等參贊二品銜即選道邵友濂署理欽差出使

大臣仍駐俄京務祈貴外部推誠相待優禮有加此本大臣所厚望也相應照會貴外部王大臣查照須至照會者

### 總署奏遵議崇厚與俄定約損失國權摺

總理各國事務恭親王奕訢等奏爲遵旨議奏事出使俄國大臣崇厚奏議明交收伊犁修定約章先後辦理情形一摺光緒五年十月十九日奉旨該衙門議奏並咨行李鴻章左宗棠沈葆楨一併妥議具奏等因欽此遵由軍機處鈔交到臣衙門除由臣衙門遵卽分咨李鴻章等妥議外查崇厚原奏內稱自行抵俄國後本年閏三月間外部尙書格爾斯隨其君赴南省巡閱其駐京使臣布策告假回國奉其君之命與臣商議一切臣度其萬難允許者力爲辯論擇其尙無妨礙者量予通

融半年之久始訂定條約十八條其大端曰交收伊犁曰兵費卹款曰分界曰通商其商務之另立專條者松花江行船一事布策欲添寫上游字樣臣僅允其至伯都訥行船貿易其餘約章所載或變通辦法或推廣舊章第有便於商情要無妨乎大體聲明統俟御筆批准後開辦施行謹將議明交收伊犁等事條約一分陸路通商章程一分卡倫單一件專條兩件鈔錄進呈等語臣等伏查此次崇厚與俄國議辦交收伊犁一事以償費通商分界爲三大端本年七八月間疊接崇厚將所議分界情形暨條約款目先後摘要電報臣等當經詳加復覈利害兼權先將最難允者分界一層等語電復崇厚並請飭下李鴻章左宗棠沈葆楨等各將與俄國新定界務商務各條款分別酌覈密摺復陳並

以界務尤關緊要由左宗棠金順錫綸等統籌全局一併覈議等因奏奉  
上諭着左宗棠等分別詳細密陳等因欽此嗣據沈葆楨李鴻章先後  
復陳沈葆楨以俄人要挾太甚應將所議作爲罷論李鴻章以通商各  
款耗損已多分界之事心殊叵測業經定議惟有竭力補救各等語十  
月初四日奉上諭李鴻章所奏各節著左宗棠一併妥議具奏等因欽  
此今據崇厚將詳細條款具奏前來臣等查俄人代收伊犁八年有餘  
前據崇厚電報中國允還盧布銀五百萬元今專條內載明此款自換  
約之日起一年內歸完議定勻作三次約共庫平銀二百八十餘萬兩  
此項係歸還代收代守伊犁兵費並補卹在中國境內被搶受虧俄商  
及被害俄民家屬之款償費一端綜計尙不爲多似可照議通商一

端前據崇厚電報俄商運俄貨走張家口嘉峪關天津漢口過通州西  
安漢中運土貨回國同路嘉峪關烏科哈密吐魯番烏魯木齊古城酌  
設領事凡設領事處及張家口准設行棧俄商在蒙古天山南北路貿  
易均不納稅其由尼布楚歸化城運貨行走今於陸路通商章程內敘  
入以上各條惟嘉峪關通商以便茶運由楚達隴左宗棠前曾議及其  
餘運貨設官免稅設棧各條擴充既廣流弊易滋且亦有礙華商生計  
俄國使臣布策等前在中國議論修約屢以爲請臣等均未允許今崇  
厚已與議定列在約章其應如何補救之方據李鴻章覆奏以立法用  
人爲要是否確有把握應由左宗棠等懍遵諭旨再行妥辦分界一端  
據崇厚聲稱俄君首以山南之地請爲注意甚堅前次電報陬爾果斯



河西及伊犁山南之帖克斯河歸俄屬云云但約略言之今條約內詳載伊塔喀分界之處而山名地名多與中國圖冊不符無憑稽核崇厚所寄伊犁分界圖內稱由俄國兵部輿圖摹出並有俄國從前佔去東西七百餘里南北三百餘里今收回者除去西南之帖克斯川外南北寬處二百四十五里窄處一百七八十里等語臣衙門均已隨時函寄左宗棠等詳細確查在案查伊犁等處分界關繫回疆全局若任俄人侵佔要隘是名爲收還伊犁而準部與回疆形格勢禁反不如不收還之爲愈左宗棠等久在西陲情形洞悉必能通盤籌畫何者尙可通融何者實多窒礙權其輕重利害一一分晰具陳竊維伊犁各城俄人佔據多年此次崇厚銜命西行原爲商辦交收之事今俄人允還伊犁崇

厚以爲復我舊疆不虛此行故於分界不免輕率與之定議而於通商等事亦未免多所遷就現在欽奉諭旨由李鴻章等妥議自必權衡得失直陳所見應俟李鴻章覆奏到後再行折衷定議以昭慎重除將崇厚先後所寄地圖兩張恭呈御覽外所有臣等遵議緣由理合恭摺密陳謹奏光緒五年十月二十七日奉旨 欽此

清季外交史料卷十七終

清季外交史料卷十八

光緒五年十一月至十二月

目錄

使俄崇厚奏與俄定約後由南洋回京摺十一月初三日

甘督左宗棠奏遵議伊犁交涉應付事宜摺附上諭十一月初五日

甘督左宗棠奏遵議李鴻章對俄交涉意見摺十一月十四日

翰林院侍讀學士黃體芳奏崇厚專擅誤國請議罪摺十一月二十一日

諭出使俄國大臣崇厚先行交部議處所議條約等件着各臣工妥

議具奏十一月二十一日

總署奏俄署使凱陽德因議處崇厚諭旨提出抗議摺

附節略十一月二十七日

總署奏定內港江河行船免碰及救護賠償審斷專章十一月二十

七日

司經局洗馬張之洞奏要盟不可曲從宜早籌禦侮摺

十二月初五日

諭出使俄國大臣崇厚著革職拿問交刑部治罪十二月初六日

直督李鴻章等奏遵議崇厚所訂俄約應准應駁及各條利弊摺

十二月初十日

司經局洗馬張之洞奏馭俄之策宜先備後講摺

十二月二十六日

伊犁將軍全順奏遵議崇厚議約失敗補救辦法摺

十二月二十九日

目錄

外交史料卷十八

光緒二十一年十一月至十二月

清季外交史料卷十八

男希隱亮編

黃巖弢夫王彥威輯

孫孝章敬立校

使俄崇厚奏與俄定約後由南洋回京摺

出使俄國大臣崇厚奏爲定約回俄都後擇日起程由南洋回京覆命  
事竊臣行抵黑海與俄國全權大臣格爾斯布策將約章圖說蓋印畫  
押業於八月十八日專摺奏明在案格爾斯於十七日定約後奏明其  
君囑臣於次日未刻進見屆時率同頭等參贊邵友濂偕往格爾斯布  
策前導繙譯官孟第傳話其君立而相見臣致詞畢隨令邵友濂同見

應對如禮退至別館與格爾斯等辭別仍乘坐火輪車於二十二日回抵比德堡城行館當將奏檔及出使大臣關防等件交代邵友濂署理並留三等參贊知府用同知蔣斯彤隨員員外郎德明塔克什訥郎中桂榮九品官福建州同王錫賡鹽大使石汝鈞守備李永春同文館教習俄人官千隨同邵友濂仍駐俄都臣卽率同隨員員外郎銜主事慶常慶禧主事純錫光祿寺署正奎文中書陳允頤八品官賡善守備常有泰把總齊樹敬整理歸裝於二十六日自俄國乘坐火輪車起程過德國由法國海口上輪船取道南洋回京覆命所有臣定約後自俄國起程日期謹繕摺具陳謹奏光緒五年十一月初三日奉旨知道

甘督左宗棠奏遵議伊犁交涉應付事宜摺

附上諭

督辦新疆軍務陝甘總督左宗棠奏爲遵旨覆陳事竊奉八月二十三日上諭總理衙門奏崇厚與俄國商辦交收伊犁事宜輕率定議畫押當經諭令左宗棠籌畫密奏本日據左宗棠奏覆陳邊務一摺所陳界務商務大略及妨民病國各條慮深思遠洵屬老成之見特崇厚現已定議畫押事機已誤惟有亟籌補救設法挽回著左宗棠懍遵昨日諭旨將商務界務如何辦理始臻周妥之處或約章必不可允邊防一切如何布置始無患生肘腋之慮詳細籌度妥議具奏等因欽此竊維國家建中立極東南濱海西北以崑崙支幹爲界畫向與俄羅斯不相聯接以蒙部哈薩克布魯特浩罕爲之遮蔽間隔也近日俄人日迫誘脅日衆哈薩克布魯特各部落多附俄人俄又取浩罕三部落拓其邊圉

於是俄與中國邊境毗連無復隔闕矣適中原兵事方殷未遑遠略俄人乘間佔據伊犁藉稱代我收復爲要索計並照其國法按竈科賦以充兵費亦稱饜足矣朝廷重念邦交既予以代我收復之名並允給償款盧布五百萬圓光緒三年西洋新聞紙載俄國議願得俄元二百五十萬交還伊犁海上傳播未必無因此次償款忽議增五百萬圓其挾詐相嘗已可概見至界務與商務兩者相因西北與東南事體各別道光中葉以後泰西各國船礮橫行海上闖入長江所爭者通商口岸非利吾土地也亦謂重洋迢遞彼以客軍深入雖得其地終無所用戰則勢孤守則費鉅合從之勢旣成獨據則啟爭分肥則利薄也中國削平髮捻兵力漸強製礮造船已覩成效彼如思逞亦有戒心而渝約稱兵



各國商賈先失貿易之利苟可相安無事其亦知難而息焉若夫俄與中國則陸地相連僅有天山北榦爲之間隔哈薩克安集延布魯特大小部落從前與準回雜處者自俄據伊犁漸趨而附之俄已視爲已有若此後蠶食不已新疆全境將有日蹙百里之勢而秦隴燕晉邊防且將因之益急彼時徐議籌邊正恐勞費不可殫言大局已難覆按也夫陸路相接無界限可分不特異日無以制憑陵卽目前亦苦無結束若不及時整理坐視邊患日深殊爲非計且俄人專尙詐力不以信義爲重其情易變屢遷與泰西各國不同斷難望其守約而持久卽如佔據伊犁之始謂俟我克復烏魯木齊瑪納斯卽當交還比官軍連下各城並克復南疆而俄不踐前言穩據如故方且庇匿叛逆縱其黨類四出

清季外交史料卷一八  
三  
窺邊如今春陝回及布魯特汗安集延條勒入犯時官軍獲生賊訊供  
搜有俄官路票昨次布魯特安集延諸賊由俄境阿來地方出竄經官  
軍剿洗殆盡漏網數十人仍遁俄境據活賊口供亦由俄官驅遣所致  
四次縱賊犯邊官軍追賊均未越俄界一步我之守約如此彼之違約  
如此尙何信義之可言當崇厚與俄官議交伊犁時俄人首以恩赦爲  
請並以曉示難於遍及爲慮崇厚奏奉諭旨飭臣照辦臣遵旨並會同  
金順出示曉諭伊犁漢陝纏土各回民等宣布皇仁以安反側金順卽  
派提督殷華廷齎示前赴伊犁張貼俄官七河巡撫忽變前議將殷華  
廷擋回不令貼示藉稱應候圖爾齊斯坦總督回信比金順二次遣殷  
華廷復往探詢七河巡撫竟派人阻之伊犁境外不准復入似此任意

把持不獨違慢朝旨並置其君與外部諸臣成議於不顧其悖謬又如  
此俄之佔據伊犁也將大城西北三城廬舍墜爲平地迤東清水河塔  
爾奇綏定二城均毀棄以居漢回蘆草溝城盤子等處均棄而不守而  
取各城堡木料於大城東南九十里金頂寺營造市廛幾二十里臣上  
年十月二十二日覆陳摺內已略言之茲接金順錫綸所言伊犁情形  
亦同察俄人用心蓋欲據伊犁爲外府佔地自廣藉爲養兵之計久假  
不歸布置已有成局我索舊土俄取兵費鉅資於俄無損而有益我得  
伊犁只賸一片荒郊北境一二百里間皆俄屬部孤注萬里何以圖存  
況此次崇厚所議第七款接收伊犁後陬爾果斯河及伊犁山南之帖  
克斯河歸俄屬無論兩處地名中國圖說所無尙待詳考但就方向而

言是割伊犁西南之地歸俄也自此伊犁四面俄部環居官軍接收墮其圈內固不能一朝居耳雖得必失庸有倖乎武事不競之秋有割地求和者矣茲一矢未聞加遺乃遽議捐棄要地饜其所欲譬猶投犬以骨骨盡而噬仍不止目前之患旣然異日之憂何極此可爲嘆息痛恨者矣金順錫綸之擬緩收伊犁而以沿邊喀什噶爾烏什精河塔爾巴哈台四城宜足兵力濬餉源廣屯田堅城堡先實邊備自非無見惟伊犁現無定議謀新疆者非合南北兩路通籌不可現在伊犁界務未定則收還一節自可從緩計議喀什噶爾烏什規畫已周毋庸再議其塔爾巴哈台精河急須加意綢繆應由金順錫綸自行陳奏請旨外所有崇厚定議畫押十八款內償費一節業經奉有諭旨第八款所稱塔城

界址擬稍改照同治三年議定界址尙只電報應俟崇厚奏到再議第十款於舊約喀什噶爾庫倫設領事官外復議增設嘉峪關烏里雅蘇台科布多哈密吐魯番烏魯木齊古城七處十四款並有俄商運俄貨走張家口嘉峪關赴天津漢口過通州西安漢中運土貨回國均經總理衙門奏奉諭旨指駁外第二款中國允卽恩赦伊犁居民業經遵旨照辦被俄官截阻齎示委員不准張貼第三款伊犁居民遷居俄國入籍者准照俄人看待意在脅誘伊犁民人歸俄而以空城貽我與截阻齎示委員同一用心第四款俄人在伊犁准照舊管業雖伊犁交還中外商民雜處無界限可分是包藏禍心預爲再據之計至商務允其多設口岸不獨奪華商生計且啟蠶食之機總理衙門原奏籌慮深遠實

已纖細畢周諭旨允行則實受其害先允後翻則曲仍在我應設法挽回以維全局竊維邦交之道論理而亦論勢本山川爲疆索界畫一定截然而不可踰彼此信義相持垂諸久遠者理也至爭城爭地不以玉帛而以兵戎彼此強弱之分則在勢而不在理所謂勢者合天時人事言之非僅直爲壯曲爲老也俄據伊犁在咸豐十年同治三年定界之後舊附中國與中國人雜處各部落被其誘脅俄官卽視爲所屬藉以肆其憑陵俄之取浩罕三部也安集延未爲所併其酋阿古柏畏俄之逼裹其部衆陷我南疆我復南疆阿古柏死逆子竄入俄境俄乃認安集延爲其所屬藉爲侵佔回疆腴地之根現冒稱喀什噶爾住居之俄屬本隨帕夏而來之安集延餘衆俄之無端冒爲已屬實與交還伊

犁仍留復據地步同一用心觀其交還伊犁而仍索南境西境屬俄其  
詭謀豈僅在此數百里地哉此界務之必不可許者也俄商志在貿易  
本無異圖俄官則欲藉此爲通西於中之計其蓄謀甚深非僅若西洋  
各國只爭口岸可比就商務言之俄之初意只在嘉峪關一處此次乃  
議及關內並議及秦蜀楚各處非不知運脚繁重無利可圖豈非欲藉  
通商便其深入腹地縱橫自恣令我無從禁制耶嘉峪關設領事庸尙  
可行至喀什噶爾通商一節同治三年雖約試辦迄未舉行此次界務  
未定姑從緩議而烏里雅蘇台科布多哈密吐魯番烏魯木齊古城等  
處廣設領事欲因商務蔓及地方化中爲俄斷不可許此商務之宜設  
法挽回者也此外俄人容納叛逆白彥虎一節崇厚曾否與之理論無

從懸揣應俟其復命時請旨確詢以憑核議臣維俄人自佔據伊犁以來包藏禍心爲日已久始以官軍勢弱欲誑榮全入伊犁陷之以爲質繼見官軍勢強難以久據乃藉詞各案未結以緩之此次崇厚全權出使喉布策先以異詞餽之枝詞惑之復多方迫促以要之其意蓋以俄與中國未嘗肇起衅端可間執中國主戰者之口妄忖中國近或厭兵未便卽與決裂以開邊釁而崇厚全權出使便宜行事又可牽制疆臣免生異議以是臣今日披瀝上陳者或不在俄人意料之中當此時事紛紜主憂臣辱之時苟心知其危而復依違其間欺幽獨以負朝廷耽便安而誤大局臣具有天良豈宜出此就事勢次第而言先折之以議論委婉而用機次決之以戰陣堅忍而求勝臣雖衰庸無似敢不勉旃



除烏里雅蘇台科布多邊務應請旨飭下該將軍大臣預籌布置以臻  
妥慎外所有新疆南北兩路軍務臣既身在事中自當與各將領敬慎  
圖維以期有濟現調南疆立功後告假回籍飭令赴喀什噶爾軍營換  
防之題奏提督陝西漢中鎮總兵譚上連挑帶舊部一營並統楊昌濬  
所練關內三營赴肅俟明春凍解先赴喀什噶爾仍歸劉錦棠總統外  
並催記名提督甘肅寧夏鎮總兵譚拔萃記名提督甘肅巴里坤鎮總  
兵席大成騎都尉世職額爾克巴圖魯戴宏勝由籍挑選舊部到甘分  
統楊昌濬所練之關內各營馳赴喀什噶爾均歸劉錦棠總統以厚兵  
力而資分布臣率駐肅親軍增調馬步各隊俟明春凍解出屯哈密就  
南北兩路適中之地駐紮督飭諸軍妥慎辦理所有進止遲速機要應

秘密者即據所見緘商總理衙門核酌務期內外一心堅不可撼維持大局仰副宸謨現將軍械先運哈密諸凡布置已有端緒其軍餉最關緊要臣與楊昌濬往復籌商如果各省關三年以內能符原議每年解足五百萬兩而各省應解金順錫綸張曜金運昌各專餉又歸有著不致分臣餉力則此次應用應增之費尙可於臣軍餉內騰挪挹注毋庸另請增撥懇飭軍機處戶部覆催各省應協各款迅卽大批起解以速補遲庶甘肅新疆大局可期無誤時事之幸亦微臣之幸也謹奏光緒五年十一月初五日奉上諭左宗棠覆陳交收伊犁事宜一摺俄人包藏禍心蓄謀已久此次俄人與崇厚所議約章流弊甚大左宗棠所奏洞澈利害深中窾要刻下崇厚計將回京覆命所有原議各條應准應

駁朝廷自當權衡辦法俄人所求不遂啟衅自在意中該督所稱先之以議論決之以戰陣自是剛柔互用之意所有新疆南北兩路邊防事宜即着預籌布置所慮者吉林黑龍江一帶均與俄境毗連不無防範難周之處將來操縱機宜該督必宜通籌全局謀定後動也現在伊犁界務未妥所有塔爾巴哈台熱河等處應如何加意綢繆之處並着與金順妥商籌辦至烏里雅蘇台科布多兩城餉絀兵單力難自固該督亦宜兼顧統籌以維全局所請飭催協餉一節着戶部查明各省應協左宗棠及金順錫綸張曜金運昌各專餉嚴催大批速解毋稍延誤

甘督左宗棠奏遵議李鴻章對俄交涉意見摺

督辦新疆軍務陝甘總督左宗棠奏爲遵旨議覆事竊臣於十月十六

日承准軍機大臣密寄光緒五年十月初四日奉上諭李鴻章奏遵議  
交收伊犁事宜一摺據稱議定約章通商各款耗損甚多至分界之事  
伊犁西界劃去數百里其患猶淺南界劃去亦數百里跨據天山隔我  
南八城往來要道心殊叵測崇厚業經定議若不允准又恐因此啟衅  
惟有竭力挽回並於立法用人二者認真籌畫或可稍資補救等語此  
事前已兩次諭令該督悉心籌議本日李鴻章所奏各節着左宗棠一  
併妥議具奏欽此臣細閱李鴻章原摺持論明通於界務商務言之確  
鑿其中如彼此人民雜處則界限仍未分明添設口岸太多則辦法別  
生枝節兩端尤爲握要臣於十月二十一日摺內已將愚見所及舉以  
入告其未盡事宜則於總理衙門書中言之區區之愚竊以俄自竊據

伊犁以來無日不以損中益外爲務蓄機甚深此次崇厚出使乃始和盤託出若仍以含糊模稜之見應之我退而彼益進我俛而彼益仰其禍患殆靡所止不僅西北之憂也譬猶人患痞塊本非和甘平淡諸藥所能爲功庸醫但顧目前不敢投以峻利之劑則痞症與人相終始無復望其有病除身壯之一日今日中俄之勢何以異此伏望於崇厚復命之日將所議各款下軍機大臣總理衙門六部九卿及將軍督撫臣會議孰准孰駁各本所見條舉以聞其所不知或知之不詳則聽其闕焉俾得各抒其靖獻之誠以達其竭忠盡力之意於我固爲有益近數月來欽奉密諭及總理衙門各疏微言大義深切著明足令外人心折應宣示者亦予宣示謨謀者天下之大公何庸秘密亦足令新聞小說

不致淆惑視聽愚昧之見謹並陳之謹奏光緒五年十一月十四日

翰林院侍讀學士黃體芳奏崇厚專擅誤國請議罪摺

翰林院侍讀學士黃體芳奏爲使臣專擅誤國請飭廷臣議罪事竊惟朝廷遣使外國意在安邊失辭不可專擅尤不可史冊所紀及歷屆奉使諸臣未有荒謬誤國如崇厚者也查崇厚奉使俄羅斯畀以全權隆以優秩宜如何籌畫萬全以副委任俄人願歸伊犁酌予犒師之費尙屬可行奈何不顧全局不慮後患通商劃界任意定約因索地而棄地欲弭釁而招釁行之則商稅日虧要害盡失不行則俄人有辭更煩唇舌其心但知畏敵國而不畏皇太后皇上於重大事件不請諭旨擅自許人不候召命擅自歸國更復於上海等處節節逗留欲伺上意漸解

再圖入見並聞其既抵都門敢潛往他處不速到京請安論奉使則不忠論復命則不敬不忠不敬邦有常刑伏望特伸威斷敕下廷臣會議重治其罪以爲人臣專擅誤國者戒謹奏光緒五年十一月二十一日

諭出使俄國大臣崇厚先行交部議處所議條約等件  
着各臣工妥議具奏

上諭都察院左都御史崇厚奉命出使不候諭旨擅自起程回京著先行交部嚴加議處開缺聽候部議其所議條約章程及總理衙門歷次所奏各摺件著大學士六部九卿翰詹科道妥議具奏十一月二十一日

總署奏俄署使凱陽德因議處崇厚諭旨提出抗議摺

附節略

總理各國事務恭親王奕訢等奏爲奏聞事竊臣衙門籌議交收伊犁各事業經先後奏明在案本月二十三日俄國署使臣凱陽德至臣衙門面詢二十一日交議諭旨是何用意並云似此情形與兩國交涉事件大有關係中國上年飭派欽差前往俄國通好俄國亦爲和好起見所以誠心商辦各事現在中國如此辦法不能不報知本國本國見此諭旨必不信中國真心和好當經臣等答以旨意將條約發交大學士六部九卿翰詹科道會議原因中國遇有大政事無不飭下臣工會議無非詢謀僉同之意此係中國向來辦法且係中國內政並與俄國無涉卽泰西各國亦有議院會議之事與此正屬相同不必疑惑凱陽德復云若將此事報知本國不但疑惑一定以爲中國不是真心和好一



定是不照辦既是中國內政俄國使臣在此無事可辦祇可就走遂卽  
艱然而去臣等當於二十五日前往凱陽德寓所告以前日未盡之言  
應再詳說以免誤會凱陽德云官面話彼此皆不必說現有心中實在  
數語相告自到中國已逾數年所有中俄交涉各事無不周知俄國遇  
事每有和好之意中國遇事每有攔阻之心從前中國邊界官辦理交  
涉事件俄國國家多不滿意迨中國飭派欽差到俄俄國以爲中國有  
和好意將從前不滿中國之處姑置勿論派員與中國使臣商辦各事  
所讓中國之處不少凡俄國官民及泰西各國均以爲不應讓與中國  
者俄國國家因欲與中國永遠和好所以特排衆論將不應讓與中國  
之處全行相讓豈知愈讓愈不見好俄國並非無力量至條約准與不

准在俄國總是一樣等因臣等當答以邊界交涉各事經迭次辯論現可不提今但就飭議條約而論中國前與各國議立條約均係各國使臣前來中國議定當彼此商議時朝廷可以隨時諮詢中外臣工所以毋庸飭議卽行批准此次中國使臣前往俄國議定條約所有條約內議立各款中外臣工均未周知自應飭下臣工會議以昭慎重且中國使臣前在俄國曾與俄國外部暨駐京使臣布策言明商辦定約之權在崇厚定辦之權則在朝廷允准卽條約亦載有恭候批准一年爲期之語現在既經飭議應俟會議覆奏再行定局且議奏在臣下而折衷則仍在朝廷無論將來如何定局總與兩國睦誼無損恐繙譯不能詳盡另有節略可以細閱凱陽德云雖如此說俄國國家得此信息必以

爲中國有藐視俄國之心現惟看中國有無和好實據各等語餘與二十三日所言大略相同臣等伏思二十一日諭旨本爲集思廣益起見乃凱陽德遽欲藉此生衅臣等惟有隨時相機剖辯詳慎辦理謹鈔錄凱陽德節略一件恭呈御覽謹奏光緒五年十一月二十七日奉旨着歸入前次交議各摺片交大學士等閱看單併發

### 附總署面交俄國署使凱陽德節略

本月二十三日貴署大臣來署面詢二十一日諭旨是何意思茲與貴署大臣詳言之本諭旨之意其頭一層係崇欽差不候諭旨擅自回國所以交部嚴加議處原與條約之事無涉至將條約發交大學士六部九卿翰詹科道會議者凡中國遇有大政事無不飭下臣工

會議即與泰西各國議院會議之意相同從前中國與貴國及各國所立之條約均係各國欽差前來中國議定當彼此商議之時中國國家可以隨時諮詢中外臣工所以不必飭議即行批准今崇欽差係在貴國議定條約所以條約內議定各款中外臣工均未周知自應飭下廷臣會議無非詢謀僉同之意查崇欽差所記問答節略內載有本年三月二十五日在貴國與格尙書布大臣面談崇欽差云商辦定約之權在我定辦之權則在朝廷允准即條約內亦載有恭候批准一年爲期之語現在朝廷既經飭議應俟所議如何再行定局總之中國素敦睦誼上年飭派崇欽差前往貴國貴國外部暨布大臣與崇欽差商辦各事彼此皆爲和好起見此次諭旨將條約飭

下大學士等會議係中國照例辦理之事並無他意兩國和好多年無論將來如何定局均須與貴國和衷商辦實於睦誼無損貴署大臣不必因此疑惑實爲幸甚十一月二十七日

總署奏定內港江河行船免碰及救護賠償審斷專章

第一項 行船章程

一、華洋行海輪船夾板船均照美英德國通行免碰新章置備各色玻璃燈響器按時動用爲號其駛入內港江河仍須照章一律舉行無庸另議至中國篷船在內港江河行駛夜間必點白色玻璃燈一盞以爲號燈其窮苦小船無力購備者准以常用白紙燈籠及別項有亮光有響聲之物爲號務使別船有所見聞防避免碰

一、華船夜行所點號燈即白玻璃燈或白紙燈遙見來船即將號燈舉起如欲往右避將燈舉向船左來船即向其燈左行如欲往左避將燈舉向船右來船應向其燈右行

一、兩船相遇左邊水寬則在左之船往左避讓右邊水寬則在右之船往右避讓如兩邊水面相同則均推舵向左彼此往右避讓倘大船與小船或輕船與重船相遇一面水淺一面水深則小船輕船均應向淺處避讓

一、華船遙見輪船號燈吹響即應防避如因風急水溜沙淺等項不能避讓則輪船總當設法緩行或停輪或退走相機讓華船行過

一、行船應讓停船後船應讓前船快船應讓緩船輕船應讓重船小船

應讓大船順風船應讓逆風船順水船應讓逆水船

一、兩船一來一往對面遙見彼此卽應舉燈或放響爲號以便預先留心防碰

一、轉灣之處華船與輪船相遇如輪船之頭向右則華船應緊靠左邊行駛如輪船之頭向左則華船應緊靠右邊行駛

一、遇霧雪黑暗行船對面不能望見之時應放響聲爲號彼此徐行

一、輪船凡遇華船擠塞水道不能行駛應暫停輪等待華船疏通再走不准強駛硬碰倘從聚泊華船之處經過必須放響徐行以免碰撞

一、行船凡遇轉灣及過橋過斷均應預先放響通知來船以免碰撞並須魚貫而行不准爭先擠碰

一、輪船大船重船有深闊水路可行不准貪圖近便駛入淺狹小港致多阻礙

一、小船一人駕駛遇有來船祇能喊讓不及兼顧舉燈放響等事應由來船察看情形相機設法避碰

第二項 停船章程

一、泊船應靠河身直處傍岸停泊前後拋錨使船身與岸一順不得僅下頭錨使船尾隨波上下以致船身橫亘河中其漁船及各項小舟並無尾錨或兩錨俱無者應用纜繩繫妥不准有礙河路

一、轉灣及江心並水面狹窄暨深水行船往來之處一概不准停泊  
一、停船夜間應掛號燈一盞如船靠右岸其燈置於船左倘船靠左岸



其燈置於船右若遇數船排泊一處外面之船已掛號燈者裏面之船免其懸燈如果船中無燈可掛則當敲更鳴鑼使來船聞聲避讓

一、河身切近河灣輪船轉灣船頭可以射及之處不准拋錨停泊

一、漁船張網捕魚停泊守候其船不准橫亘水中須擇近岸水淺之處暫泊並掛燈爲號倘值油燭缺乏不能點亮之時應吹響爲號

一、泊船如遇水面寬闊之處船頭向岸船尾在外者其燈應掛船尾使別船望見避讓但水面狹窄之處祇准一船將船身傍岸暫停不准數船排泊總之停船必須讓出別船往來水路庶免梗阻碰撞

### 第三項 救護章程

一、凡遇兩船碰後兩船船主互相細查情形如彼船傷重可危此船尙

能兼顧者則當盡力救援彼船倘見危不救疾駛圖逃告官罰辦兩船相碰之後船主應各將船暫停彼此互看各無損傷無庸救護方可各自前駛

一、碰船後兩船各將已之船名牌號船主姓名並其船向在何口現從何處來應往何處去彼此詳細告知備查

一、兩船相碰甲船沉沒乙船不救轉將甲船之人致死滅口希圖免賠者告官究辦

一、輪船行駛浪湧波翻如有華船未被碰撞爲餘波潑沉者輪船亦當停輪救援

一、行船失事船貨將沉如有附近小船及居民人等前往救護所獲貨

物全數繳官給還原主倘有私運入已及乘危強搶者告官分別追究

第四項 賠償章程

一、兩船相碰一船有錯一船無錯自當專令有錯之船賠補如兩船均各有錯彼此無庸賠償若碰船之事因人力難施則兩船之人均爲無錯亦彼此免賠

一、兩船相碰或船貨均沉或船傷而貨無損或貨損而船無傷均視碰船情形何船有錯卽由何船船東照例將所損船貨估價賠償

一、碰船致斃人命每名給卹銀一百兩受傷未死者每名給養傷銀五十兩若因傷重殞命加給卹銀五十兩倘係官員另議加給

一、碰船情形不同有此船碰彼船而彼船復碰別船接連相碰多船者  
如果錯在此船則彼船別船多船被碰受損皆應此船賠還

一、碰船賠款應由船東船主措交惟賠償銀數總以本船所變價值加  
以此次所得水脚數目爲限此外船東家產與此無涉不能令其併  
抵

一、碰船與兩船貨主無干不能責令貨主分賠若船上僱用引水之人  
此次碰船係由引水人之錯可令引水人分賠

#### 第五項 審斷章程

一、碰損之船無論卽時沉沒或逾時沉沒總以沉由被碰爲定碰船之  
時情形變幻不一必須詳細查訊因何碰撞按照中外通行免碰章

程辨別何人之錯酌量斷賠

一、斷賠船貨應由官核實確查估計不以船主開報數目爲憑

一、碰船賠款如船東船主實係無力繳不足數無可再追者中外官員會查明確酌議減賠以示體恤

一、偏僻處所貧愚鄉民駕駛小船未悉中外行船免碰定章或無力置備號燈響器致被碰撞失事者事告到官應卽秉公審訊原情斷給賠償撫卹不得責以違章置不准理

一、救獲碰船貨物由官查明撈救難易情形按照所獲貨價酌斷賞項分給撈救之人酬勞其貨給還失主仍在應賠船貨之人名下追繳賞項

一、撈獲碰船所失貨物全行繳官並未入己而失主昧良逞刁指爲隱匿或誣以強搶圖賴酬勞妄索賠還者照誣告例治罪

一、行船路見別船有相碰之事出力救援者由官從優酌賞以昭激勸倘別船因碰涉訟則從旁救援之船可以到官作證

一、無人處所兩船相碰甲船沉沒乙船不救轉將甲船之人推入水中淹斃滅口圖絕告發免賠者爲首起意及同謀之人均應嚴拿治以死罪倘有據實報官首告者免罪給賞

一、兩船相碰如均係華人自置之船應由華官訊斷如均係洋人自置之船應由洋官訊斷如一係華人自置之船一係洋人自置之船應由中外官員會審如洋人之船並無洋官在華可由華官邀同有約

之國領事一二員幫同會訊商斷若該洋人之船不服所斷聽其自  
赴外國控告由各該管之國辦理

一、洋人入中國內地游歷通商僱用內地華船如與華船相碰則兩船  
皆係華人應歸華官審斷洋人不得插身幫訟若有碰失洋人貨物  
應賠者由華官會商洋官酌議妥辦十一月二十七日

司經局洗馬張之洞奏要盟不可曲從宜早籌禦侮摺  
司經局洗馬張之洞奏爲要盟不可曲從禦侮宜籌早計謹熟權利害  
披瀝上陳事竊臣近閱邸鈔因俄國定約使臣辱命奉有廷臣集議之  
旨所有條約傳聞大概臣竊不勝憤懣謹將此約從違利害縷晰陳之  
新約十八條他姑勿論其最謬妄者如陸路通商由嘉峪關西安漢中

直達漢口秦隴要害荆楚上游盡爲所據碼頭所在支蔓日盛消息皆通邊圉雖防堂奧已失不可許者一東三省國家根本伯都訥吉林精華若許其乘船至此即與東三省全境任其游行無異陪京密邇肩背單寒是於綏芬河之西無故自蹙地二千里且內河行舟乃各國積年所力求而不得者一許俄人效尤踵至不可許者二朝廷不爭稅課當恤商民若準回兩部蒙古各盟一任俄人貿易概免納稅華商日困猶末也以積弱苦貧之蒙古徒供俄人盤剝以新疆鉅萬之軍饟徒爲俄人委輸且張家口等處內地開設行棧以後逐漸推廣設啟戎心萬里之內首尾銜接不可許者三中國藩屏全在內外蒙古沙漠萬里天所以限俄人卽欲犯邊迤北一面總費周折若蒙古臺站供其役使彼更



將捐重利以啗蒙人一旦有事音信易通糧運無阻勢必煽我藩屬爲彼先導不可許者四條約所載俄人准過卡倫三十有六延袤太廣無事而商往則譏不勝譏有事而兵來則禦不勝禦不可許者五各國商賈從無明言許帶軍器之例今無故聲明人帶一鎗其意何居假如千百爲羣闖然徑入是兵是商誰能辨之不可許者六俄人商稅種種取巧如各國希冀均霑洋關稅課必至歲絀數百萬不可許者七同治三年新疆已經議定之界又欲內侵斷我南通八城之路新疆形勢北路荒涼南路富庶爭礮瘠棄膏腴務虛名受實禍不可許者八伊犁塔爾巴哈台科布多烏里雅蘇台喀什噶爾烏魯木齊古城吐魯番哈密嘉峪關等處准設領事官是西域全疆盡歸控制有洋官則有洋商有洋

商則有洋兵初則奪我事權既則反客爲主馴至彼有官而我無官彼有兵而我無兵且各國通商通例惟沿邊沿海准設外邦領事若烏里雅蘇台科布多烏魯木齊古城哈密吐魯番嘉峪關乃我境內今自俄人作備設各國援例十八省腹地將徧布洋官不可許者九名還伊犁而三面山嶺內卡倫以外盤據如故據高臨下險要失矣割霍爾果斯河以西格得滿島以北屯墾無區畜牧無所地利盡矣金頂寺久爲俄人市廛既與約定俄人產業不更交還是伊犁一綫東來之道必穿俄巢出路絕矣寥寥遺黎彼又盡遷以往人民空矣擲二百八十萬有用之財索一無險要無地利無出路無人民之伊犁將安用之不可許者十俄人索之可爲至貪至橫崇厚允之可謂至謬至愚皇太后皇上赫

然震怒譴使臣下廷議可謂至明至斷上自樞臣總署王大臣以至百司庶官人人知其不可所以不敢公言改議者誠懼一經變約或召崤端然臣以爲不足懼也必改此議未必有事不改此議不可爲國請言改議之道其要有四一曰計決二曰氣盛三曰理長四曰謀定何謂計決無理之約使臣許之朝廷未嘗許之崇厚誤國媚敵擅許擅歸國人皆曰可殺者也伏望拿交刑部明正典刑治使臣之罪即可杜俄人之口按之萬國公法既有不准違訓越權之例復有可否仍在朝廷之條正與崇厚不遵密函不請諭旨之罪相合者英之獄成憲昭然故立誅崇厚則計決何謂氣盛俄人欺我使臣孤懦逼脅畫押施一償百意猶未饜不料俄羅斯覲然大國乃至出此不特中國憤怒卽環海萬國亦

必皆不直其所爲至俄使不待定議聲言歸國外洋亦無此例况凱陽德係署理公使豈能擅歸其爲恫喝無實情狀顯然儘可聽其去留不必過問莫若明降諭旨將俄人不公不平臣民公議不願之故布告中外行文各國評其曲直並屬各國會堂將我國家情理兼盡之處刊入新聞紙明諭邊臣整備以待據衆怒難犯之情執國敵不從之志俄國雖大自與土耳其苦戰以來師老財殫臣離民怨近歲其國主屢有防人行刺之舉若更渝盟犯順圖遠勞民必且有蕭牆之禍行將自斃焉能及人故明示中外則氣盛何謂理長種種要約皆由伊犁而起若盡如新約所得者伊犁二字之虛名所失者新疆二萬里之實際而每年尙須耗四五百萬饟需以供邊師防軍建城開屯之用是有新疆尙不

如無新疆也索伊犁而盡拂其請則曲在我置伊犁而仍肆責言則曲在俄况使臣畫押未奉御批未鈐御寶一如載書未畝豈足爲憑俄人理屈詞窮焉能生衅故緩索伊犁則理長何謂謀定俄人而講信義兵端可以不開若俄人必欲背公法棄和好設防之處大約三路一新疆一吉林一天津左宗棠席屢勝之威兵力素強金順劉錦棠錫綸張曜亦皆健將以靜待動俄人必敗聯絡喇嘛棍噶札拉參遏其歸路彼將踣輪不返若出吉林邊地遼奠林谷叢雜其地去俄都二萬餘里懸軍深入饋饟艱難不能用衆如特簡兼資文武之將帥授以重權資以的餉分南北洋海防經費之半爲經略東三省之資命左宗棠金順選撥籍隸東三省之知兵將官數人東來聽用招集索倫赫津打牲人衆教

練成軍其人素性雄勇習與俄鬪定能制勝卽小有挫衄堅守數月必解而去天津一路逼近神京然俄國兵船扼於英法公例向不能出地中海卽強以商船載兵而亦非西洋有鐵甲等船者比李鴻章高勛重寄歲糜數百萬金錢以製機器而養淮軍正爲今日若並不能一戰安用重臣伏請嚴飭李鴻章諭以計無中變責無旁貸及早選將練兵仿照德國新式增建礮臺戰而勝則酬以公侯之賞不勝則加以不測之罰設卽以贖伊犁之二百八十萬金僱募西洋勁卒亦必能爲我用俄人蠶食回疆吞併浩罕意在拊印度之背不特我之患亦英之憂也李鴻章若以此開悟英使輔車唇齒當可同仇近年立功宿將如彭玉麟楊岳斌鮑超劉銘傳善慶岑毓英郭松林宋慶喜昌彭楚漢郭寶昌曹

克忠李雲麟陳國瑞等或現任或退間或處廢籍如酌量宣召來京令其詳議籌策分駐京通津沽及東三省以備不虞山有猛虎自可建威銷萌故急修武備則謀定臣非敢迂論高談以大局爲孤注惟深觀事變日益艱難西洋撓我權政東洋思滅琉球今俄人又故挑衅端若更忍之讓之從此各國相偪而來至於忍無可忍讓無可讓又將奈何無論我之禦俄本有勝理卽或疆場之役利鈍無常臣料俄人雖五戰不能越嘉峪關雖三勝不能薄寧古塔終不至掣動全局曠日持久頓兵乏食其勢自窮何畏之有然則及今一決乃中國強弱之機尤人才消長之會此時猛將謀臣尙可一戰若再閱數年左宗棠雖在而已衰李鴻章未衰而將老精銳漸盡欲戰不能而俄人則已城於東屯於西行

棧於北縱橫窟穴於口內外通衢藏脅朝鮮不以今日捍之於藩籬而待他日鬪之於庭戶悔何及乎要之武備者改議宜修不改議亦宜修伊犁者改議宜緩不改議亦宜緩崇厚者改議宜誅不改議亦宜誅此中外羣臣之公言非臣一人之私言也輔謀在疆臣作氣在百僚據理力辯在總理衙門而決計獨斷始終堅持則在我皇太后皇上事關宗社大計坐視不能緘默不敢仰懇將臣此疏發交廷臣會議不勝憂憤迫切之至謹奏光緒五年十二月初五日

諭出使俄國大臣崇厚着革職拿問交刑部治罪

上諭吏部奏遵旨嚴議請將前都察院左都御史崇厚照違制例議以革職等語崇厚奉命出使並不聽候諭旨擅自起程回京情節甚重僅



予革職不足蔽辜崇厚着先行革職拿問交刑部治罪十二月初六日

直督李鴻章等奏遵議崇厚所訂俄約應准應駁及各

### 條利弊摺

直隸總督李鴻章等奏爲遵旨會議將條約分別准駁事十一月二十一日內閣奉上諭都察院左都御史崇厚奉命出使不候諭旨擅自起程回京着先行交部嚴加議處開缺聽候部議其所議條約章程及總理衙門歷次所奏各摺件著大學士六部九卿翰詹科道妥議具奏等因欽此臣等遵將條約章程及各摺件公同閱看竊謂交鄰之道務在持平謀國之方貴於慮遠臣等通籌全局豈敢故持高論使總理衙門獨爲其難惟檢閱崇厚所定條約其不可許者約有四端曰伊喀塔各

城定界曰新疆內外蒙古通商曰運貨直至漢口曰行船直至伯都訥  
敢就籌畫所及爲我皇太后皇上陳之新疆二萬里北路形勝全在伊  
犁所以控制外藩聯絡回部條約所載第七條將伊犁西邊及帖克斯  
川一帶歸俄國管屬查伊犁向設八城以金頂寺爲咽喉以帖克斯川  
爲脈絡以霍爾果斯河爲大渠以海弩克臺爲沃土今閱圖內所劃紅  
界西面緊逼伊犁南面自烏宗島山向東而南而西至罕顛葛里山一  
帶將南通回部之路截斷伊犁形勢不全膏腴盡失難以自存又第三  
條居民願遷者酌予限期攜帶財物第四款俄人置有產業者照舊管  
業將城爲中國之城而民爲俄民土爲俄土必至官如贅疣事多掣肘  
有交還之虛名無收復之實際其他如改定喀城界址及第八條塔爾

巴哈台交界處所其所舉山川與滿蒙還音之字不甚同臣等無憑指撥惟查塔爾巴哈台於同治三年經明誼與俄臣雜哈勞將界議定旋於同治九年經立界大臣奎昌建立牌博各在案理應永遠遵守毋相侵越何以此次又改界址得寸思尺殊失友邦之誼喀什噶爾向有安集延浩罕爲屏蔽與俄國本不接壤今俄人既吞併浩罕設立省會自應定界以息爭端但準情酌理祇應就浩罕本境劃歸俄國亦未便越我甌脫占我藩籬此界務礙難允許之實在情形也通商一節固在彼此交利尤在彼此相安如第十條之嘉峪關等處徧設領事第十二條之俄國在天山南北內外蒙古貿易均不納稅無論華商失業權稅全虧有妨中國政治卽論中外交涉幅員既廣照料難周市廛雜處既虞

因爭競而啟衅端沙漠荒涼更恐疏保護而釀巨案在我固屬失利在彼亦未必無害此商務礙難允許之實在情形也俄商運貨由嘉峪關取道漢中西安以達漢口查所定陸路通商章程第十七條於俄商有益之事處處力爭於俄商不便之事處處規避率行議准南洋之弊竇叢生西路之隱憂更迫此運貨直至漢口礙難允准之實在情形也咸豐八年愛琿和約內一條係烏蘇里黑龍江松花江居住兩國所屬之人令其一同交易一條係黑龍江松花江烏蘇里河只准中國俄國行船詳譯原約貿易專指居民行船各在本境文義明顯何致講解紛歧今俄國率欲添寫上游字樣崇厚卽允其至伯都訥並與沿江一帶居民貿易殊與定約不符似此節節闖入其意何居此行船直至伯都訥

礙難允許之實在情形也臣等悉心酌度伊犁地方既經俄國代收代  
守自應酌償經費如俄國將伊犁人民土地全境交還分界通商各事  
均作罷論所議兵費卹款銀二百八十餘萬擬請俯准如數償給分起  
歸還以敦和好以重報施至伊犁塔各城定界新疆內外蒙古通商及  
運貨直至漢口行船直至伯都訥各端現值御批未准之先據理剖辯  
僅係口舌之爭若於條約一允之後枝節蔓延卽成肘腋之患彼時百  
變環生大局將不可問惟有仰懇飭下總理衙門王大臣決意堅持剴  
切辯論收目下轉圜之效杜日後啟衅之由不可專顧一時致誤全局  
總之臣等所議理所可許者無不曲從勢所難行者未便遷就明知中  
俄修好有年邦交宜固而欲全信義須泯詐虞若陽爲歸地尋盟陰則

恃強罔利俄國當不其然總理衙門王大臣公忠謀國共濟時艱必能相機籌辦以抒宵旰而杜要求諒無待臣等再三之瀆臣等尤願皇太后皇上修明政治整頓邊防以奮中外之人心以鞏祖宗之基業天下幸甚謹奏光緒五年十二月初十日奉旨

司經局洗馬張之洞奏馭俄之策宜先備後講摺

司經局洗馬張之洞奏爲馭俄之策斷宜先備後講詳籌邊計以定宸謨事竊臣於本月初五日曾上一疏備論俄約從違利害朝廷旣一再下廷議矣臣前疏之意要以急修武備爲重竊揆朝廷之意亦未嘗不以修備爲是而似不免以修備爲難豈非洞見二十年來邊備一無可恃遂覺中國大勢斷不足以禦強鄰故不免長慮却顧不得已而出於

講耶臣愚以爲無備則不能戰無備則並不能講及今而言備尙有可備之兵尙有可備之饒尙有可備之人敢就前疏未盡之意詳切臚陳唯聖明垂察焉備之法曰練兵曰籌饒曰用人練兵如何首練蒙古兵蒙古各盟與聖清累朝同休戚與今日中華同利害雍乾間征討準回各部均資其兵力以集大勳近年各藩無才日就貧弱俄人乘機闖入烏梁海南北受其牢籠喀魯倫河東西寔爲田牧漸且盡奪膏腴雜居無限一旦有事卡倫鄂博直如虛設彼將徑叩邊牆擬請特命蒙古王大臣隨帶曉習邊事文武數員同歷各盟體察土謝圖等四汗所屬情形息耗強弱諸王台吉才智高下縷晰以聞布告各盟曉以俄人叵測意在蠶食蒙疆激勵所部講求牧政簡練成軍創辦之始酌給饒需蒙

人以蓄牧爲耕鑿若多發帑金市其戰馬配給邊軍蒙人得金我軍得馬邊軍多馬則兵強蒙馬易售則蒙人因富而亦強設俄人內犯我堅守邊牆蒙人截其輜重擊其惰歸其師必盡蒙古強則我之屏蔽也蒙古弱則彼之魚肉也出入之間利害不可以道里計矣其次練回兵沙漠荒寒馳驟搏擊南人十不敵北人一關內人十不敵邊外人一劉錦棠之軍名爲湘軍實多隴西壯士關外流民以故所向有功額魯特種人性質强悍阿拉善之部內向練有喇嘛兵數千亦甚可用若推廣於西北各部喇嘛擇其桀出者假以呼圖克圖名號必能號召約束執爇前驅哈薩克雖爲俄人所脅逃出歸化者不少若令錫綸招徠此輩加以訓練庶湘營之勢不孤以後屯戍之役更不煩征調南軍矣其次練



東兵黑龍江人素樸勇古有滿萬無敵之稱國朝名將多產其間將軍得人則盡人皆爲勁旅吉林金匪盤據日久黨類繁多必欲剿捕驅除盡空其地斷無是事莫若撫之使爲我用免爲俄人所誘轉致多樹一敵又其次練北洋兵李鴻章新購蚊子船頗稱便利惜爲數不多而其價尙廉似宜向歐洲續造數十艘專派統領分屯北洋大沽營口煙臺三處一方有警兩口赴援伺敵登岸圍其舟而焚之敵無歸矣惟舟師海戰准人十不敵閩廣人一請勅閩廣督臣擇熟悉海戰將弁數人招募閩廣精卒來津聽用水陸之備既完如更密諭曾紀澤結英圖俄攻所必救以掣敵勢此亦一奇也籌饒如何北洋所需本有海防經費新疆所需本有西征專饒東三省饒項向於南洋海防經費或各關提存

二成內酌撥惟整頓蒙軍及沿邊重鎮如科布多烏里雅蘇台歸化城庫倫張家口諸處雖係次衝如從容布置亦須增兵增餉竊思各省營勇除津防西征兩軍外現存不下數百營節腹地之虛糜即可供邊軍之騰飽擬請敕下各督撫酌量裁撤大約汰四存六而邊饜出矣此外若倍徵洋藥稅歲可得數百萬酌提江廣漕折運脚亦可得二三十萬整頓淮綱但能專折商私所得亦不下數百萬錢流地上得人斯理耳用人如何蒙古部當以蒙古主之科爾沁親王伯彥諾謨祐世篤忠員廉樸勇敢若令其總統各盟副以大臣分防烏里雅蘇台庫倫兩路當能遠追超勇親王策凌之英風近紹忠親王僧格林沁之餘烈劉錦棠前敵大將若假以重權則聲威益振錫綸現扼塔爾巴哈台爲極邊張

曜可使備科布多爲後路均宜重其任厚其兵裕其饟使三軍相與犄角則俄屬不敢西牧矣至東三省內撫外攘斷非長才不辦現任各將軍才皆不逾中人恐不足以備緩急可否於京外大員中遴選數人特降諭旨令將經畫關東方略條議以聞就中察其實有條理器閎志壯者授以東方之任若夫綜攬九邊指揮諸將一如問耕問織當責之素習之人似宜密諭左宗棠將各路戰守機宜明白條上設異日俄人敗盟必開兵端卽令左宗棠別薦老成屬以隴事而身自來朝入閣以備廟堂咨訪籌策亦無不可昔范仲淹自請行邊識者以爲措置西事當在中書可見運籌決勝不在自將臨邊鎮一方何如策全局乎其籌饟事理尤在度支得人侍郎閻敬銘長於綜核理財有效朝野咸知今雖

養疴山居並非篤老閻敬銘之心何嘗一日忘天下哉若蒙溫旨宣召動以時艱諭以大義該侍郎豈忍堅辭得閻敬銘以理度支朝廷當不復憂饋饟矣此外文武之才儲備宜廣擬請敕李鴻章左宗棠切實薦舉以備錄用邊才本屬專門方今京外通弊冗員多而真才少不索何獲不學何能卽如李鴻章左宗棠等若非中原多事久歷兵間何由而成何由而見伏望敕下各部堂官各省督撫就屬員中訪求志節可造之人有願講求邊事者卽令奏請發往東西兩邊以資練習隱逸之士及未仕者亦許一體列薦數年之後人才輩出安知不更有駕李鴻章左宗棠而上之者何至令朝廷西顧東瞻思不得頗牧之歎哉出使絕國漢有專科必如陸賈之辯蘇武之節傅介子陳湯之權略常惠班超

之勇方稱斯職並請諭令疆臣亟爲物色備行人之選庶可與謀臣戰士相輔爲功有備如此可以戰矣然臣知國家之意非欲戰也卽臣之言亦非求戰也必實有戰心實有戰具而後可以爲講之地也則請更籌講法一曰責以義自我聖祖以來與俄國久通盟聘不以藩屬畜之並不以外夷目之我兵圍雅克薩城俄人窮蹙聖祖不忍舍而弗攻前有徐元文之碑後有察畢那之案載在盟府炳若日星是我之有德於俄一也迭次所獲羅刹宜番等百餘人不加誅戮賜居京師編爲佐領是我之有德於俄二也世宗時俄國官生來學於是建俄羅斯館於是立俄羅斯學學醫則遣蒙古醫往學喇嘛經典則遣託波爾番僧往是我之有德於俄三也恰克圖開關互市以利俄商縱茶黃出口以活俄

民乾隆間俄人渝約犯禁我高宗如天之度不加以兵因其悔罪仍許通商是我之有德於俄四也我有四德俄不知報咸豐八年乘我方有兵事給奕山而攘我烏蘇里江東之地五千里又誑我沿邊常住卡倫以外之地萬餘里文宗念舊盟重鄰畔閱兩國生靈因而畀之環海四洲莫不以俄爲曲今又乘我天子冲齡邊圉甫定挾小惠以徼大利俄之君臣獨不畏懼違天不祥之咎乎一曰折以約陸路通商不便原許酌商不得節外生枝則有感豐十年之續約第十四條在有緊要妨礙之處尙未滿限立即議改則有同治八年改訂之約第二十二條在界牌永無更改他地並不侵佔則有感豐十年之續約第一條在邊界既定登萊繪圖兩國永無此疆彼界之爭則有感豐十年之約第九條在

張家口不設領事不立行棧則有同治八年改定之約第四條在京城  
恰克圖二處公文准用台站站費兩國共之今云在蒙古地方天山南  
北行路寄信概用台站新約有舊約無准設領事向止伊塔喀三城今  
又增烏魯木齊六處新約有舊約無入邊道路止恰克圖近邊碼頭止  
張家口今又取道關隴以達漢口新約有舊約無松花江行船至伯都  
訥與沿口一帶居民貿易新約有舊約無俄人來路向出北道尙免西  
防今由科布多過歸化城運貨前往天津新約有舊約無蒙古貿易或  
准或未准今忽以中國蒙古並蒙古各盟已設官未設官之處括之新  
約有舊約無不納稅者向止兩國邊界百里內爲然今云在中國蒙古  
地方關外天山南北概不納稅新約有舊約無通商總例向完正稅子

稅今云陝甘漢口不納子稅新約有舊約無交易原須兩利華商豈可偏枯今云准以貨物抵帳新約有舊約無通商許人帶兵器一件未言火器查洋鎗洋礮洋火藥向爲禁物今云人帶一鎗新約有舊約無領事官向止與地方官平行自不得與大憲抗禮今云領事與大憲往來用信函會晤用友邦禮新約有舊約無就臣所指駁者固已如此其多其他或自相矛盾或影射欺蒙若總理衙門更按各國條約參酌比例並檢俄國歷屆照會逐細研求可駁者更復何限以此詰俄俄其何辭三曰怵以勢俄人懾於義箝於約善矣若猶不聽則請說之曰俄逞威貪利將謂中國仁讓不能勝也我守已固我軍已蒐閉關絕市荼黃不出東結混同江思歸之義民而收哈薩克布魯特反正之舊部俄西犯



則我以一將軍襲尼布楚東寇則我輕騎以破浩罕復伊犁俄人萬里孤軍長城前戈壁後士卒頓芻糧絕俄軍必殲卽我軍不克我力不支則我猶出下策擲孤注西委阿里以賜英吉利使之越裏海以取土爾扈特舊牧地東捐臺灣山後以賜日本使之復庫頁島以斷東海口激土耳其以宿憾使仇俄陷日耳曼以重利使絕俄兵連禍結俄之精銳竭於外俄之亂黨起於內恐彼德羅堡國都非俄有也俄人自命大國比年收納難民代採軍糈其心亦頗欲市義沽名今見我有備而又參理勢兼剛柔以動之蔑不聽矣至使臣緩急變通則當更求操縱之法或新約不許而增兵費卹款之數以易伊犁或新約不許而令左宗棠劃窮邊荒遠無關要害之地數百里與之使盡歸伊犁山川要隘是我

清季外交史料卷一  
三二

棄一石田而得完伊犁也新約不許伊犁不歸則令歸我罪人白彥虎我仍以償款酬之此一役也俄有所得既足以戢戎心我除遺孽亦足以存國體此三者爲奇兵爲活着臨事相機是在使臣之善應矣綜而論之備爲主講爲輔操縱爲變化我苟無備俄人知我虛實肆其恫喝雖有辯士將不得言言亦不信雖然修備之道並非朝廷頒一詔書疆吏辦一覆奏已也竊念自咸豐以來無年不辦洋務無日不講自強因洋務而進用者數百人因洋務而糜耗者數千萬冠蓋之使交錯於海邦市舶之司日增於腹地屈已捐愛將曰待時事閱三朝積弱如故一有俄事從違莫決縉紳束手將帥變色卽號憂國持高論者亦徒吁嗟太息而不能知其所以然泄泄悠悠委其憂於君父今猶中興時也不

知十餘年後又將何以處之有七年之病而不蓄三年之艾此古來志士仁人所爲扼腕而歎恨者也伏願自今日始君臣上下臥薪嘗膽戒酖毒之安惕肘腋之患專心求賢才破格行賞罰如仍有以含垢姑安養晦縱敵之說進者一切斥勿用然後修備始非虛文矣昔者晉無失德符堅恃強而伐之渡淮而堅滅宋無亂政完顏亮恃強而伐之臨江而亮亡天眷所在雖偏安之朝猶足以勝強敵況以國家德澤之深疆域之廣物力雖絀而未窮人才雖稀而不盡如謂修德修政竭禹迹九州之全力而不能與一鄰國抗殆亦數千年來史冊所未有者也仰懇皇太后皇上將臣此疏交再議之王大臣等一併議奏以備採擇謹奏光緒五年十二月二十六日交總理衙門詹事府本日軍機大臣面奉

清季外交史料卷十八 三十一  
諭旨前因王大臣在總理衙門會議事件降旨令洗馬張之洞前往嗣後王大臣等有應行諮商之處著該衙門知照該洗馬前往欽此相應傳知貴衙門欽遵可也此交

### 伊犁將軍金順奏遵議崇厚議約失敗補救辦法摺

伊犁將軍金順奏爲遵旨密陳事竊奴才於十月初一日接奉軍機大臣密寄光緒五年八月二十三日奉上諭總理衙門奏籌辦交收伊犁事宜請飭疆臣嚴議一摺等因欽此奴才謹就管見之所不便與時事之所亟宜行者敬爲皇太后皇上縷晰陳之細閱條款所載其毋庸議置者十一其必不可允者七一則伊犁民人遷居俄國入籍者准照俄人看待自通商以來中國奸民久倚外國爲逋逃藪况新疆夙鮮居民

自大兵戡定而後強者蒙誅悍者走險今其寄居伊犁者非懦弱之良民卽逆回未經懲創之餘也若復允其所請則伊犁之民其誰不解體勢將舉伊犁而空之苟無人何有土且逆回驕悍成性必倚俄人滋生事端俄且暗縱之使擾我邊鄙顯問之則佯爲不知如去歲俄人所收陝回之竄擾其明證也事固有似微而實鉅者此類是也一則俄人在伊犁置有財產准其照舊管業夫俄人之財產何所庸置彼自居伊犁而後九城之內誰非其有興修創造莫敢誰何若如第四款所議則伊犁豈復有我駐足之所不但此也設要隘之地形勝之區彼皆豫爲佔據詭託置產將驅而去之耶抑將忍而受之耶驅而去之是爲背約忍而受之是謂養癰二者之中無一而可是自困之道也一則接收伊犁

後伊犁之陜爾果斯河及山南之帖克斯河均歸俄屬並塔城界址亦擬稍改查陜爾果斯河卽霍爾果斯河帖克斯河卽特克斯河夫我與俄人壤地本不相接中間隙地原所以處哈薩克諸部自同治三年定約以來藩籬之地盡爲俄有而哈薩克亦遂爲俄屬民致塔城一隅去俄鎮僅三十里聚九州鐵鑄此大錯若如左宗棠之議作爲甌脫之地彼此不居尙可挽回於萬一必如俄人之請則霍爾果斯河去伊犁大城九十餘里特克斯河爲通南八城要路而塔城尤獨當其衝一旦割爲俄境豈獨弱己以強敵彼且扼我吭而拊我背矣此界務之必不可允者也至如第十款舊約喀什噶爾庫倫設領事官現准嘉峪關烏科哈密吐魯番烏魯木齊古城酌設領事第十三款設領事處及張家口

准設行棧第十四款俄商運俄貨走張家口嘉峪關赴天津漢口過通  
州西安漢中運土貨回國同路自古馭外之法不貴乎我之所能往而  
貴乎彼之不得入蓋不入則內聞無自而生外聞亦無自而乘我之所  
以欲得伊犁者以其爲中土屏蔽也夫俄人於中國常存耿耿逐逐之  
心彼之所以遲遲而發者誠以言語不通情僞不悉患取之而不能守  
耳若允其通商之議則民之情僞彼得而知之地之險要彼得而據之  
逆回之反側彼得而煽之奸民之蠢動彼得而乘之種種弊端實難枚  
舉是我得伊犁一彈丸不守之地蕩然自隳其中外之防直不啻舉全  
土而畀之議者乃謂有病於華商生計猶後也此尤商務之必不可允  
者也總之代收代守交還從古無此事理彼非有大欲乎其中必不肯

輕以相就固不待智者而知之奴才之不敢遽議減兵者以此奴才之屢以餉項爲慮者亦以此蓋兵減則勢單無以懾其奸志餉絀則勢渙無以戢我軍心以目下之兵力而論置邊防則兵分而力弱取伊犁則兵合而勢強且防不勝防將來難以收局誠如聖心所慮況中國自用兵以來已三十餘年矣元氣本未盡復加以水旱頻仍偷邊釁一開內地設有他慮其事實難設想顧索還而貽後患殊失戎機畏難而不索還亦傷國體夫立國者不患敵之強而患不能自強闢土者不患取之難而患守之不固我自定新疆以後人民未盡復業田地大半蕪萊善後事宜諸多未舉據奴才愚見覆以另議之文令總理衙門或由左宗棠反覆與之辯論我則於喀什噶爾烏什精河塔爾巴哈台分設重兵



嚴密而爲之備其烏科兩城亦應及時籌備以防不虞移饑饉之民以實邊選材智之士以教戰廣屯田以足食興廢利以生財內以復己耗之元氣外以覲進止之機緣難不自我而發約不自我而背彼以越境窺伺則勒兵以痛擊之靜以制動逸以待勞庶乎可發可收可進可退其能就我範圍交還伊犁也固可相遇而安其不就我範圍交還伊犁也亦可相機而動此奴才所以前此有急者緩之虛者實之之議也此又時事之亟宜行者也奴才身膺疆寄非不知進可圖功所以慮出於此者實以朝廷之全局攸關其究應如何辦理之處伏候聖裁謹奏光緒五年十二月二十九日奉旨覽奏均悉所陳新約必不可允各節實能洞見利弊此事現經王大臣會議亦與該將軍意見相同所有該處

